



REPUBLIKA Y'U RWANDA

**KOMISIYO Y'IGIHUGU
Y'UBUMWE N'UBWIYUNGE**



**IBIGANIROMPAKA KU MUCO W'AMAHORO,
UBUMWE N'UBWIYUNGE MU MASHURI
ABANZA, AYISUMBUYE N'AY'IMYUGA**

Mutarama, 2017

ISHAKIRO

| | |
|--|-----------|
| IJAMBO RY'IBANZE..... | 7 |
| AMAGAMBO Y'IMPINE..... | 9 |
| ISOBANURAMPAMVU Y'IBIGANIROMPAKA KU MUCO W'AMAHORO, UBUMWE N'UBWIYUNGE MU BIGO BY'AMASHURI ABANZA, AYISUMBUYE N'AY'IMYUGA..... | 10 |
| 1 Iriburiro..... | 10 |
| 2 Intego z'ibiganiro..... | 10 |
| 3 Insanganyamatsiko y'ibiganirompaka..... | 11 |
| 4 Umusaruro utegerejwe..... | 11 |
| 5 Uburyo ibiganiro bizakorwamo..... | 12 |
| 6 Uburyo bwo gusuzuma ibyavuye mu biganiro no gutanga raporo..... | 12 |
| 7 Ikurikiranabikorwa..... | 13 |
| I. AMASHURI ABANZA..... | 14 |
| 1. GAHUNDA Y'UKO IBIGANIROMPAKA BIZAKORWA..... | 14 |
| 2. UBURYO BWO KUYOBORA IBIGANIRO..... | 17 |
| 2.1. Uburyo bwo kuyobora ibiganiro muri rusange..... | 17 |
| 2.2. Uburyo bwo kuyobora i kiganiro muri buri cyiciro..... | 19 |
| 3. IBIGANIROMPAKA KU MUCO W'AMAHORO MU MASHURI ABANZA..... | 20 |
| Imyitwarire iboneye..... | 20 |
| Inshingano n'uburenganzira bw'umwana..... | 21 |
| Indangagaciro z'umuco nyarwanda..... | 22 |
| Kwimenya no kumenya abandi..... | 23 |
| II. AMASHURI YISUMBUYE N'AY'IMYUGA..... | 26 |
| 1. GAHUNDA Y'UKO IBIGANIRO BIZAKORWA (umwaka w'amashuri wa 2017)..... | 26 |

| | |
|---|----|
| 2. UBURYO BWO KUYOBORA IBIGANIRO..... | 31 |
| 2.1. Uburyo bwo kuyobora ikiganiro muri rusange | 34 |
| 2.2. Uburyo bwo kuyobora i kiganiro muri buri cyiciro | 34 |
| 3. IBIGANIROMPAKA KU BUMWEN’UBWIYUNGE MU MASHURI YISUMBUYE N’AY’IMYUGA MU RWANDA | 35 |
| U RWANDA, UBWENEGIHUGU NYARWANDA, UBUNYARWANDA..... | 35 |
| 0. Intego..... | 35 |
| 1. Iriburiro | 35 |
| 2. Ibisobanuro by’amagambo..... | 36 |
| 3. Ibiranga Repubulika y’u Rwanda | 38 |
| 4. Imitegekere y’Igihugu cy’u Rwanda | 42 |
| 5. Ubwenegihugu Nyarwanda | 43 |
| 6. Ubunyarwanda..... | 46 |
| IMIBANIRE Y’ABANYARWANDA MU MATEKA YABO..... | 52 |
| 0. Intego | 52 |
| 1. Iriburiro | 52 |
| 2. Imibanire y’Abanyarwanda mbere y’ubukoloni | 53 |
| 3. Imibanire y’Abanyarwanda mu gihe cy’ubukoloni..... | 56 |
| 4. Imibanire y’Abanyarwanda muri Repubulika ya mbere n’iya kabiri..... | 58 |
| 5. Imibanire y’Abanyarwanda nyuma ya Jenocide | 61 |
| JENOSIDE N’INGENGABITEKEREZO YAYO, IPFOBYA N’IHAKANA N’UBURYO BWO KUBIRWANYA..... | 63 |
| 0. Intego: | 63 |
| 1. Ibisobanuro by’amagambo | 63 |
| 2. Ibyiciro by’itegurwa rya Jenocide..... | 65 |
| 3. Ibyaha byibasira inyokomuntu..... | 65 |
| 4. Amateka ya Jenocide ku isi..... | 67 |

| | |
|--|----|
| 5. Imiterere y'ingengabitekerezo ya Jenoside mu mahanga..... | 70 |
| 6. Jenoside yakorewe abatutsi mu Rwanda n'ingaruka zayo..... | 70 |
| 7. Ipfobya n'ihakana rya Jenoside yakorewe abatutsi..... | 71 |
| 8. Ingamba zo kurwanya ipfobya n'ihakana rya Jenoside yakorewe abatutsi..... | 72 |
| 9. Uko Jenoside zikorwa:..... | 74 |
| 10. Uko Jenoside zirwanywa..... | 74 |
| INZIRA Y'UBUMWE N'UBWIYUNGE MU RWANDA..... | 78 |
| 0. Intego y'ikiganiro..... | 78 |
| 1. Ibisobanuro by'amagambo..... | 79 |
| 2. Ubumwe bw'Abanyarwanda mu mateka..... | 80 |
| 3. Isenyuka ry'ubumwe bw'Abanyarwanda..... | 81 |
| 4. Ingaruka z'isenyuka ry'ubumwe bw'Abanyarwanda..... | 83 |
| 5. Urugendo rwo gusana ubumwe bw'Abanyarwanda..... | 83 |
| 6. Inkingi z'ubumwe n'ubwiyunge | 84 |
| 7. Inzitizi zikigaragara mu nzira y'ubumwe n'ubwiyunge..... | 87 |
| 8. Ingamba zo guteza imbere Ubumwe n'Ubwiyunge..... | 87 |
| 9. Uruhare rw'urubyiruko mu guteza imbere Ubumwe n'Ubwiyunge..... | 88 |
| GUKUMIRA, GUHOSHA NO GUKEMURA AMAKIMBIRANE MU MURYANGO NYARWANDA..... | 90 |
| 1. Intego rusange :..... | 90 |
| 2. Amakimbirane ni iki ?..... | 91 |
| 3. icyo amakimbirane ashingiyeho..... | 92 |
| 4. Ibitera amakimbirane..... | 93 |
| 5. Ubwoko bw'amakimbirane..... | 94 |
| 6. Inzego z'amakimbirane..... | 94 |

| | |
|--|-----|
| 7. Uko amakimbirane yigaragaza..... | 95 |
| 8. Uburyo bwo gusesengura amakimbirane..... | 95 |
| 9. Uburyo bwo gusesengura amakimbirane(ibishushanyo)..... | 96 |
| 10. Akamaro ko gusesengura amakimbirane..... | 98 |
| 11. Amahame y'usesengura amakimbirane..... | 98 |
| 12. Ingaruka z'amakimbirane..... | 99 |
| 13. Uburyo bwo gukumira, guhosha no gukemura amakimbirane..... | 100 |
| 14. Uko amakimbirane yigaragaza mu muryango nyarwanda..... | 104 |
| INYANDIKO N'IBITABO BYIFASHISHIJE..... | 106 |

IJAMBO RY'IBANZE

U Rwanda rurakataje mu kuba Igihugu cyunze ubumwe, Abanyarwanda n'abagituye bisanzuyemo kandi giharanira ahazaza heza habereye buri Munyarwanda.

Ubumwe n'ubwiyunge by'Abanyarwanda byumvikana nk'imigenzereze y'abaturage bemera ko basangiye ubwenegihugu, umuco n'uburenganzira bungana, barangwa n'ubwizerane, ukuri, komorana ibikomere batewe n'amateka mabi bacyemo kugira ngo bashobore kwiteza imbere mu mahoro asesuye.

Amateka y'imiyoborere mibi yabaye intandaro y'umuco wo kudahana, ubwicanyi, ubwishishanye, urwikekwe, ihezwa rya bamwe ku byiza by'Igihugu, n'inzangano mu Banyarwanda zishingiye ku macakubiri n'ivangura byavuyemo Jenocide yakorewe Abatutsi. Ibi bibazo n'ibindi byinshi bishingiye ku miyoborere idaha agaciro Umunyarwanda byabaye imbogamizi mu iterambere ry'Igihugu.

Nyuma yo kubohora u Rwanda muri Nyakanga 1994 hashyizweho Guverinoma y'Ubumwe bw'Abanyarwanda, yihutiye kugarura umutekano mu Gihugu no kunga ubumwe bw'Abanyarwanda bwo shingiro n'inkingi y'amahoro n'iterambere rirambye.

Mu bufatanye na Minisiteri y'Uburezi, Komisiyo y'Igihugu y'Ubumwe n'Ubwiyunge yateguye gahunda y'ibiganirompaka igamije kubaka ubudahangarwa n'imitekerereze isesengura by'umwihariko mu babyiruka mu rwego rwo gukomeza kwimakaza umuco w'amahoro ubumwe n'ubwiyunge. Hateguwe inyoborabiganiro izafasha mu ishyirwamubikorwa ry'iyi gahunda iteganijwe mu mashuri abanza, ay'isumbuye, ay'imyuga, amakuru na kaminuza.

Gahunda nziza y'uburezi kuri bose yitabiriwe bishimishije muri iki gihe mu Rwanda, yahaye amahirwe yo kwiga abana b'u Rwanda bose bujuje imyaka yo gutangira ishuri, bikaba bitanga icyizere ko

iyi gahunda y'ibiganirompaka byubaka izagera kuri benshi mu babyiruka, bakayigiramo uruhare ikabagirira akamaro.

Ni urubuga rwo kungurana ibitekerezo ku mibanire iboneye no gusobanukirwa ukuri ku bibazo by'amateka u Rwanda rwanyuzemo n'icyerecyezo kizima Abanyarwanda bahuriyeho. Kubaka umuco wo kungurana ibitekerezo byubaka mu bwubahane, ni bumwe mu buryo bwo gukangurira buri Munyarwanda uburenganzira bwe, kubahiriza ubw'abandi no kubuharanira igihe cyose.

By'umwihariko mu mashuri abanza, iyi gahunda yibanda ku ngingo zigamije guteza imbere umuco w'amahoro n'ubworoherane mu bana bakiri bato, naho abo mu byiciro byisumbuyeho mu mashuri yisumbuye, ay'inyuga, amakuru na kaminuza bagakomereza ku ngingo zimbitse ku bireba ubumwe n'ubwiyunge n'Ubunyarwanda nk' isano muzi ihuza Abanyarwanda ubwabo ikanabahuza n'Igihugu cyabo.

Komisiyo y'Igihugu y'Ubumwe n'Ubwiyunge ishima uruhare rw'inzego zitandukanye mu guteza mbere ubumwe bw'Abanyarwanda ikanashimira Abanyarwanda muri rusange ubushake n'umuhate bagaragaza mu rugendo rwo kwiyunga no kubaka ubumwe bwabo.

NDAYISABA Fidèle

**Umunyamabanga Nshingwabikorwa wa Komisiyo
y'Igihugu y'Ubumwe n'Ubwiyunge**

AMAGAMBO Y'IMPINE

APROSOMA : Association Pour la Promotion de la Masse

CDR : Coalition for the Defence of the Republic

FPR : Front Patriotic Rwandais

MDR : Mouvement Democrate Republicain

MRND : Mouvement Révolutionnaire National pour
le Développement

NURC : National Unity and Reconciliation Commission

ONU : Organisation des Nations Unis

PARMEHUTU : Parti pour l'Emancipation Hutu

RTLTM : Radio Télévision Libre des Mille Collines

RANU : Rwandese National Union

URSS: Union des Republiques Socialistes Soviétiques

ISOBANURAMPAMVU Y'IBIGANIROMPAKA KU MUCO W'AMAHORO, UBUMWE N'UBWIYUNGE MU BIGO BY'AMASHURI ABANZA, AYISUMBUYE N'AY'IMYUGA

1 IRIBURIRO

Mu rwego rwo gukomeza kubaka ubudahangarwa n'imatekerereze isesengura (*resilience and critical thinking*) no gushishikariza ababyiruka kugira gahunda z'ubumwe n'ubwiyunge izabo na Ndi Umunyarwanda by'umwihariko, hateganyijwe ibiganirompaka mu mashuri abanza, ayisumbuye n' ayimyuga byo mu Rwanda.

2 INTEGO Z'IBIGANIRO

Intego rusange:

Kubaka umuco w'ibiganirompaka byubaka mu mashuri no guha urubuga abanyeshuri rwo kungurana ibitekerezo kuri gahunda z'ubumwe n'ubwiyunge.

Intego zihariye :

1. Kuzamura imyumvire y'abanyeshuri kuri gahunda z'Ubumwe n'Ubwiyunge na Ndi Umunyarwanda by'umwihariko (*National Identity*);
2. Kungurana ibitekerezo biciye mu biganiro no kumenya gutega amatwi no kubaha ibitekerezo by'abandi ;
3. Guha umwanya urubyiruko wo kugaragaza ibitekerezo byarwo ;
4. Gufasha urubyiruko gusobanukirwa neza ingingo zitandukanye zifitanye isano n'ubumwe n'ubwiyunge ;
5. Guteza imbere imibanire myiza mu rubyiruko no muryango nyarwanda muri rusange.

3 INSANGANYAMATSIKO Y'IBIGANIROMPAKA

- **Mu mashuri abanza, ibiganirompaka bigamije kwimakaza umuco w'amahoro n'indangaciro zawo,**

Insanganyamatsiko ni izi zikurikira:

1. Imyitwarire iboneye
2. Inshingano n'uburenganzira bw'umwana
3. Indangaciro z'umuco
4. Kwimenya no kumenya abandi

- **Mu mashuri yisumbuye n'ay'imyuga, iyi nyoborabiganiro igizwe n'insanganyamatsiko zikurikira:**

1. U Rwanda, Ubwenegihugu Nyarwanda, Ubunyarwanda
2. Imibanire y'Abanyarwanda mu mateka yabo
3. Jenoside n'ingengabitekerezo yayo, ipfobya n'ihakana n'uburyo bwo kubirwanya
4. Inzira y'ubumwe n'ubwiyunge mu Rwanda
5. Gukumira, guhosha no gukemura amakimbirane mu muryango nyarwanda

4 UMUSARURO UTEGEREJWE

1. Urubyiruko rw'abanyeshuri rubonye urubuga rwo kunguraniramo ibitekerezo ;
2. Imyumvire y'abanyeshuri kuri gahunda z'ubumwe n'ubwiyunge no kubaka ubunyarwanda iteye imbere ;
3. Abanyeshuri basobanukiwe akamaro n'agaciro ko gutega amatwi ibitekerezo by'abandi mu bwubahane ;
4. Abanyeshuri bagize gahunda ya Ndi umunyarwanda iyabo ;
5. Ibiganiro bibaye umusemburo w'impinduka nziza mu bigo by'amashuri no hanze yabyo ;
6. Umuco w'ibiganiro mu rubyiruko utejwe imbere ;
7. Ibiterekerezo bivuye mu biganiro bifashije iteganyamigambi.

5 UBURYO IBIGANIRO BIZAKORWAMO

Ibiganiro bizajya biyoborwa n'ubuyobozi bw'ishuri hashingiwe ku nsanganyamatsiko; Ubuyobozi bw'ishuri bugomba gutoranya abarezi bizeweho ubushobozi n'imyitwarire bikwiriye bayobora abanyeshuri mu biganiro;

Ubuyobozi bwa buri shuri bukora gahunda ijyanye n'umubare w'abanyeshuri n'imiterere y'aho baturira kandi hagashyirwaho uburyo bwo gukurikirana no kugenzura ko abanyeshuri bose bitabira ibiganiro uko bikwiriye;

Ubuyobozi bw'ishuri bushobora kandi kugira abandi bwifashisha bubonamo inararibonye;

Uyoboye ikiganiro atanga umurongo mugari w'ikiganiro; abanyeshuri bagatanga ibitekerezo cyangwa ubuhamya mu bwisanzure; barabaza kandi bakagira n'uruhare mu gusubiza ibibazo;

Umuyobozi w'ikiganiro afasha abanyeshuri kugera ku mwanzuro w'impaka bagize n'uw'ikiganiro muri rusange.

Buri kwezi hakorwa nibura ikiganiro kimwe (1) kitarenza isaha imwe mu mashuri abanza n'amasaha abiri (2) mu mashuri yisumbuye n'ay'imyuga.

6 UBURYO BWO GUSUZUMA IBYAVUYE MU BIGANIRO NO GUTANGA RAPORO

1. Isuzuma rizajya rikorwa n'ubuyobozi bw'ishuri harebwa ubwitabire, ubwisanzure mu gutanga ibitekerezo n'imiterere yabyo kandi harebwe n'impinduka mu mibanire y'abanyeshuri ubwabo no hagati yabo n'abarezi.
2. Isuzuma kandi rizajya rikorwa n'ubuyobozi bw'ishuri harebwa imigendekere y'ikiganiro mu gihe gikorwa na nyuma yacyo.
3. Buri shuri rizajya risuzuma impinduka nziza ibiganiro bizaba byaragize aho rihereye.

4. Ku mashuri abanza, ay'isumbuye n'ay'imyuga, buri shuri rizajya rishyikiriza Ubuyobozi bw'Akarere raporo ya buri gihembwe.
5. Ubuyobozi bw'Akarere nabwo buzajya buhuza raporo zavuye mu bigo by'amashuri abanza, ay'isumbuye n'ay'imyuga.
6. Ubuyobozi bw'Akarere buzajya bushyikiriza iyo raporo ya buri gihembwe Minisiteri ishinzwe Uburezi, bumenyeshe Komisiyo y'Igihugu y'Ubumwe n'Ubwiyeunge.

7 IKURIKIRANABIKORWA

Mu rwego rwo gukurikirana neza ishyirwamubikorwa ry'ibiganirompaka mu mashuri, Minisiteri ifite uburezi mu nshingano zayo na Komisiyo y'Igihugu y'Ubumwe n'Ubwiyeunge bakurikirana uko iyi gahunda yubahirizwa.

Mu gukurikirana iki gikorwa (coordination, harmonization, ownership) hakenewe ubufatanye n'uruhare rw'ubuyobozi bw'ishuri.

Ibitekerezo n'ibyifuzo bizaturuka mu biganiryo bizajya bifasha kunoza gahunda y'ibikorikira.

Ku rwego rw'Igihugu, Komisiyo y'Igihugu y'Ubumwe n'Ubwiyeunge izakurikirana ishyirwamubikorwa ry'iyi gahunda y'ibiganirompaka n'umugaruro bitanga.

I. AMASHURI ABANZA

1. GAHUNDA Y'UKO IBIGANIROMPAKA BIZAKORWA

Hakurikijwe ingengabihe y'amashuri mu mwaka w'amashuri wa 2017, ibiganiro mpaka mu mashuri abanza bizakurikiza gahunda ikurikira:

➤ IGIHEMBWE CYA MBERE

Ukwezi kwa mbere kw'igihembwe cya mbere abanyeshuri bazaganirizwa ku «Imyitwarire iboneye» (igice cya mbere)

- Kubaha Imana
- Kugira isuku
- Kubahiriza igihe
- Kwiyubaha no kubahana

Ukwezi kwa 2 kw'igihembwe cya mbere abanyeshuri bazaganirizwa ku «Imyitwarire iboneye » (igice cya kabiri)

- Gusangira
- Kwirinda umururumba
- Kutigunga
- Gukina

➤ IGIHEMBWE CYA 2

Ukwezi kwa mbere kw'igihembwe cya 2 abanyeshuri bazaganirizwa ku: «Inshingano n'uburenganzira bw'umwana »:

- Gufatanya n'abandi
- Kubahiriza amabwiriza
- Kumenya uburenganzira bwe n'ubwa bagenzi be
- Isuku no kwita ku bidukikije

Ukwezi kwa 2 kw'igihembwe cya 2 abanyeshuri bazaganirizwa ku: « Indangagaciro z'umuco »

- Kugira ubutwari n'ishyaka
- Gukunda igihugu
- Kuba umunyakuri
- Kwihangana

- Kunyurwa
- Kugira uburere
- Kutararikira iby'abandi
- Kuvugisha ukuri

Ukwezi kwa 3 kw'igihembwe cya 2 abanyeshyuri bazaganirizwa ku: « Kwimenya no kumenya abandi »

- Kwirinda ibiyobyabwenge no kwiandarika
- Kugira icyizere no kwigirira icyizere
- Kwihagararaho no gukorera kuri gahunda

Ukwezi kwa 4 kw'igihembwe cya 2 abanyeshyuri bazaganirizwa ku: « Ubufatanye »

- Kugira impuhwe
- Ubwuzuzanye
- Gukorera hamwe

➤ **IGIHEMBWE CYA 3**

Ukwezi kwa mbere kw'igihembwe cya 3 abanyeshyuri bazaganirizwa ku:

« Kwiyubaha, kubaha abandi no kwemera ubudasa » (igice cya mbere)

- Koroherana
- Gusaba imbabazi
- Gutanga imbabazi

Ukwezi kwa 2 kw'igihembwe cya 3 abanyeshyuri bazaganirizwa ku:

« Kwiyubaha, kubaha abandi no kwemera ubudasa » (igice cya kabiri)

- Kudaheza
- Gusabana
- Gutega amatwi
- Kunyurwa
- Kubaha abakuru

Icyitonderwa:

1. **Ukwezi kwa 3 kw'igihembwe cya 3**, abanyeshuri bashobora kuganirizwa kuri imwe mu ngingo itarabonye umwanya uhagije mu gihe cy'ibiganiro cyangwa ku ngingo zimwe na zimwe abanyeshuri bagaragazamo ibibazo by'imyitwarire itaboneye.
2. Iyi gahunda yateguwe hashingiwe ku ngengabihe y'umwaka w'amashuri wa 2017 ariko ibiganiro bizakomeza gutangwa no mu myaka itaha ku buryo bukurikira :

| No | UKWEZI | MU MASHURI ABANZA |
|----|---------------------------------|--|
| 1 | Ukwezi kwa mbere kw'amasomo | Imyitwarire iboneye (igice cya mbere) |
| 2 | Ukwezi kwa kabiri kw'amasomo | Imyitwarire iboneye (igice cya kabiri) |
| 3 | Ukwezi kwa gatatu kw'amasomo | Inshingano n'uburenganzira bw'umwana |
| 4 | Ukwezi kwa kane kw'amasomo | Indangagaciro z'umuco nyarwanda |
| 5 | Ukwezi kwa gatanu kw'amasomo | Kwimenya no kumenya abandi |
| 6 | Ukwezi kwa gatandatu kw'amasomo | Ubufatanye |
| 7 | Ukwezi kwa karindwi kw'amasomo | Kwiyubaha, kubaha abandi no kwemera ubudasa (igice cya mbere) |
| 8 | Ukwezi kwa munani kw'amasomo | Kwiyubaha, kubaha abandi no kwemera ubudasa (igice cya kabiri) |
| 9 | Ukwezi kwa cyenda kw'amasomo | Indi ngingo mwarimu abona ko ari ngombwa. |

2.UBURYO BWO KUYOBORA IBIGANIRO

Mu rwego rwo kuyobora ibiganiro, umuhuza w'ibiganiro azifashisha uburyo bwo kuyobora ibiganiro muri rusange ariko kuko abanyeshuri biga mu mashuri abanza bari ku nzego z'imyumvire zitandukanye, kuri buri cyiciro hazajya hiyongeraho uburyo bwihariye.

2.1. UBURYO BWO KUYOBORA IBIGANIRO MURI RUSANGE

2.1.1. Gufasha abanyeshuri kumva no gusobanukirwa insanganyamatsiko

- **Gusembura ibiganiro**

Umuhuza w'ibiganiro azasembura ibiganiro akoresheje bumwe mu buryo bukurikira:

- Kwerekana ibishushanyo biri bufashe abitabiriye ibiganiro kuvumbura insanganyamatsiko
- Kubabwira agakuru cyangwa kubacira umugani bibafasha kugera ku nsanganyamatsiko
- Kubereka filimi, gutangiza indirimbo bibafasha kuvumbura insanganyamatsiko
- Gutangiza agakino (role play)
- Kubabaza ibibazo ku nsanganyamatsiko ugamije kugirango wumve uko bayumva
- Kwemeranya ibyo mugiyeye kuganiraho (Hari igihe ubwabo baba babivumbuye cyangwa umuhuza w'ibiganiro akabibagezaho)

- **Kubagezaho no kudasobanurira neza intego z'ikiganiro**

Umuhuza w'ikiganiro asobanurira neza abanyeshuri intego y'ikiganiro, akabasaba kuza gutanga ibitekerezo ku nsanganyamatsiko bisanzuye.

- **Kubagezaho insanganyamatsiko no kudasaba kuyitangaho ibitekerezo** (*Mbere y'uko umuhuza*

w'ibiganiro asobanura insanganyamatsiko abaza abitabiriye ikiganiro icyo bayiziho n'uko bayumva akaba aribyo aheraho abuzuza anabasobanurira)

- Kwandika/ kuvuga insanganyamatsiko
- Gusobanura insanganyamatsiko mu buryo bugari muri rusange no mu Rwanda by'umwihariko
- Gutanga ibitekerezo ingingo ku yindi bigakorera mu matsinda cyangwa muri rusange.

2.1.2. Gushyira abanyeshuri mu matsinda no kudasobanurira icyo bagiye gukora

- **Gutanga ibitekerezo**

Bamaze gusobanukirwa insanganyamatsiko, hakorwa amatsinda agahabwa ibibazo bimwe cyangwa bitandukanye biganisha kuri ya nsanganyamatsiko. umuhuza w'ibiganiro agakurikirana uruhare rwa buri wese mu itsinda mu gutanga ibitekerezo. Amatsinda ahabwa iminota 45 yo kungurana ibitekerezo. Buri tsinda ryitoramo umuyobozi waryo n'umwanditsi. Umuhuza w'ibiganiro akurikirana imirimo yo mu matsinda akagenda abasobanurira abagarura ku nsanganyamatsiko.

Icyitonderwa: Iyo hatakoreshajwe amatsinda, insanganyamatsiko iganirwaho n'abitabiriye ibiganiro bose muri rusange bari hamwe, bakayunguranaho ibitekerezo nyuma umuhuza w'ibiganiro akabikusanya, akabigorora bigafasha abaganiriye kugira imyumvire imwe kandi ibonereye.

- **Gukusanya ibitekerezo byavuye mu matsinda:**

- Buri tsinda rigaragariza abandi ibyo ryagezeho
- Abagize andi matsinda babaza ibibazo ku byo bamaze kugezwaho, bakunganirana mu kubisubiza ku buryo n'abo mu yandi matsinda bashobora kubunganira cyangwa kubuzuza.

-Amatsinda akurikirana bitewe n'uko yagabanyijwe, uko byifujwe cyangwa uko bishobora kuzuzanya

-Umuhuza atanga umwanzuro ndetse akaba yakongeraho ibitavuzwe

2.1.3. Kubaza abanyeshuri icyo ikiganiro kibasigiye

Umuhuza w'ikiganiro abaza abanyeshuri ibibazo bituma bagaragaza inyigisho batahanye nyuma agatanga incamake y'ikiganiro ashingiye ku ntego y'ikiganiro akanatanga isomo abagikurikiye bagomba gutahana.

2.1.4. Guha abanyeshuri umukoro wo gutahana

Abari mu biganiro basabwa kujya gusangiza abandi icyo bakuyemo, babakangurira kwimakaza aho bari hose umuco w'amahoro, ubworoherane, gushyira imbere ubunyarwanda himakazwa ubumwe n'ubwiyunge bw'Abanyarwanda.

2.2. UBURYO BWO KUYOBORA IKIGANIRO MURI BURI CYICIRO

2.2.1. Mu mashuri abanza

Mu mashuri abanza hakwifashishwa uburyo bwavuzwe hejuru ariko hagakoreshwa ibiganiro muri rusange bihuriza hamwe abanyeshuri. Ibiganiro byakorwa mu byiciro 3: icyiciro cya mbere kikajyamo abana bo mu mwaka wa 1,2; icyiciro cya kabiri kijyamo abanyeshuri bo mu mwaka wa 3,4; naho icya gatatu kikajyamo abo mu wa 5,6.

- Mu gusembura ibiganiro hakoreshwa indirimbo, udukino, imigani, ibishushanyo byose biganisha ku nsanganyamatsiko.
- Kubabwira insanganyamatsiko n'intego yo kuyiganiraho, nyuma ukababaza utubazo duto duto tubafasha kumva neza insanganyamatsiko.

Urugero:

- Iyo bababwiye amahoro mwumva iki?

- Ese ubworoherane bwo ni iki?
- Iyo habuze amahoro n'ubworoherane bigenda bite?

Mu mashuri abanza ikiganiro ntikigomba kurenza isaha imwe.

Umuhuza w'ibiganiro ashobora gukoresha ubundi buryo bwose butavuzwe bushobora gutuma abanyeshuri barushaho kumva insanganyamatsiko no gutanga ibitekerezo kugira ngo intego y'ikiganiro igerweho.

3. IBIGANIROMPAKA KU MUCO W'AMAHORO MU MASHURI ABANZA

Mu mashuri abanza, iyi nyoborabiganiro igizwe n'insanganyamatsiko zerekeranye n'umuco w'amahoro n'indangagaciro zawo ari zo zikurikira:

1. Imyitwarire iboneye
2. Inshingano n'uburenganzira bw'umwana
3. Indangagaciro z'umuco
4. Kwimenya no kumenya abandi

INSANGANYAMATSIKO YA I :

IMYITWARIRE IBONEYE

- **Kubaha Imana :** Abana bazaganira ku iremwa ry'isi n'ibiyiraho byose. Basobanukirwe ko Imana ariyo yaremye ibyo byose kandi ko ikwiye icyubahiro, basabwe ko buri wese mu kwemera kwe aho ari hose azajya azirikana ko Imana ariyo nkuru kandi ko isumba byose.
- **Kugira isuku no kwita ku bidukikije :** Abana bazaganirizwa ku isuku icyo aricyo, basobanurirwe ko isuku ari ngombwa muri byose kuko ariyo soko y'ubuzima. Baganire uburyo bwo kubungabunga ibidukikije, kubigirira isuku n'akamaro kabyo.

- **Kubahiriza igihe** : Abanyeshuri bazungurana ibitekerezo ku buryo bwiza bwo gukorera ku gihe no kucyubahiriza, uburyo bazajya bahuza ibikorwa byabo n'igihe byagenewe barwanya ingeso mbi zo gukererwa kuko igihe kirahenda. Urugero : Nibatubahiriza igihe bagakererwa Kugera ku ishuri amasomo azabacika.
- **Kwiyubaha no kubahana** : Abana bazaganira ku myitwarire myiza igomba kubaranga biyubaha ubwabo aho bari hose kandi bakubaha na bagenzi babo. Buri gihe bagahora barangwa n'ikinyabupfura.
- **Gusangira** : Abana bazungurana ibitekerezo ku muco mwiza wo gusangira na bagenzi babo, bagasaranganya ibyo bafite.
- **Kutigunga, gusabana no gukina** : Abana bazaganira ku myitwarire yo gusabana, bakiyumva muri bagenzi babo, bagakina kandi bagahora babikangurira na bagenzi babo. Bazasobanurirwa ko abantu bose bagomba kubana kivandimwe, mu bwubahane, bafashanya muri byose kuko inkingi imwe itubaka inzu.

Insanganyamatsiko ya 2 :

INSHINGANO N'UBURENGANZIRA BW'UMWANA

- **Gufatanya n'abandi no gukorera hamwe** : Abana bazaganira ku muco wo gukorera hamwe, basobanukirwe ko guhuza imbaraga byihutisha ibikorwa intego, zikagerwaho vuba kuko abishyize hamwe nta kibananira.
- **Kubahiriza amabwiriza** : Abanyeshuri bazaganira ku mabwiriza icyo ari cyo, uburyo yubahirizwa, n'akamaro kayo. Bazasobanukirwa ko umuryango w'abantu ugira amahame ngenderwaho wifashisha kugirango abawugize bagire

umurongo uboneye bagenderaho mu buzima bwabo bwa buri muni.

- **Kumenya uburenganzira bwe n'ubwa bagenzi be :** Abanyeshuri bazaganira ku burenganzira bwa muntu, basobanukirwe ko buri wese afite uburenganzira bungana n'ubwa mugenzi we kandi ko bugomba kubahirizwa kuri buri wese. Bazaganira ku ngaruka zo kutubahiriza amahame mpuzamahanga y'uburenganzira bwa muntu muri rusange no mu Rwanda by'umwihariko.

Insanganyamatsiko ya 3 :

INDANGAGACIRO Z'UMUCO NYARWANDA

- **Kugira ubutwari n'ishyaka :** Abanyeshuri bazungurana ibitekerezo ku butwari icyo ari cyo, bafatira ingero ku banyarwanda n'abanyamahanga babaye intwari. Bagashishikarira kwiga bashyizeho umwete kugira ngo bazakure bashobora kwitangira igihugu kandi bagahera kuri bagenzi babo no ku baturanyi bagaragaza ubwo butwari.
- **Gukunda igihugu :** Abanyeshuri bazungurana ibitekerezo ku gihugu icyo ari cyo ndetse n'umuco wo kugikunda nk'uko umwana akunda umubyeyi we akamuhoza ku mutima n'iyi baba batari kumwe. Ibyo bivuga ko umunyarwanda akwiye guharanira ibiteza imbere igihugu cye akarwanya ibigishubiza inyuma n'iyi yaba ari mu mahanga ntakwiye gutakaza Ubunyarwanda.
- **Kuba umunyakuri :** Abanyeshuri bazasobanukirwa ko kuba umunyakuri bishingiye ku guha cyangwa guhesha umuntu ibyo agenewe, kutabogama, gukurikiza amategeko, kuba umugabo w'ibyabaye, kurenganura urengana, kunga bagenzi be cyangwa abaturanyi be.

- **Kwihangana** : Abana bazaganira ku kwirinda uburakari budashira kuko usibye no kubangamira abandi, uburakari butuma umuntu ahora yijimye kandi ntiyisanzure aho ari akaba yahubuka mu byo akora, akaba ariyo mpamvu kwihangana ari ingenzi mu mibereho ya muntu muri rusange n’umunyeshuri by’umwihariko.
- **Kunyurwa no kwirinda umururumba** : Abana bazungurana ibitekerezo ku muco mwiza wo kwirinda irari ry’ibyo abandi bafite, bakanyurwa n’ibyo bafite byaba bike, byaba byinshi. Bagahora bagira ishyaka ryo gukora kugirango bagere ko cyo bifuzwa bagikoreye ubwabo.
- **Kugira uburere** : Abanyeshuri bazungurana ibitekerezo ku burere, ku itandukaniro hagati y’umuntu n’inyamaswa kuko umuntu atozwa kubana n’abandi batabangamiranye bigakorwa kuva umuntu agisamwa kugeza ashaje bikozwe n’abakuru ku bato cyangwa urungano. Uburere bwifuzwa mu Rwanda ni ubudaheza.
- **Kuvugisha ukuri** : Abanyeshuri bazungurana ibitekerezo ku kugira umuco wo gutanga amakuru yizewe bakaba bayasubiramo bibaye ngombwa, bakirinda kwihererana amakuru ahubwo bagasobanuzwa ababyeyi cyangwa abayobozi bitabaye ibyo bashobora guhishira abagizi ba nabi cyangwa hakagira urengana.

Insanganyamatsiko ya 4 :

KWIMENYA NO KUMENYA ABANDI

- **Kwirinda ibiyobyabwenge no kwiandarika** : Abanyeshuri bazungurana ibitekerezo ku biyobyabwenge n’ingaruka zabyo. Ibyo biyobyabwenge bishobora kuba ibiribwa, ibinyobwa cyangwa ibindi bishobora kujya mu mubiri w’umuntu bigatuma atekereza cyangwa akora mu buryo burengeje ubushobozi kamere bwe cyangwa agatakaza ubushobozi runaka asanganywe. Bazaganira kandi ku buryo

bakwirinda kwiyandarika, birinda ababashukisha utuntu dutandukanye turimo amafaranga n'iby'amaraha, ahubwo bagaharanira icyabageza ku ndoto zabo bafashijwe n'ababyeyi, abarezi n'ubuyobozi bwiza. Ikindi kandi bazibukiranya ko ari ibiyobyabwenge, ari ukwiyandarika, kimwe gishobora gukurura ikindi.

- **Kugira icyizere no kwigirira icyizere** : Abanyeshuri bazasobanukirwa icyizere icyo ari cyo, bamenye ko mbere na mbere bagomba kwiyubakamo icyizere bo ubwabo, kandi bakanizerana hagati yabo birinda ikintu icyari cyo cyose cyashaka kubabibamo amacakubiri.
- **Kwihagararaho no gukorera kuri gahunda** : Abanyeshuri bazaganira ku muco wo kugira intego mu byo bakora, bagakorera ku mihigo, bakagira gahunda bakurikiza kandi ibikorwa byabo bikubahiriza igihe cyagenwe.
- **Kugira impuhwe** : Abanyeshuri bazungurana ibitekerezo ku kugirira impuhwe ubabaye bakabigira umuco. Mu bababaye harimo nk'imfubyi, abapfakazi, abarwayi, abakene bakabije, abihebye n'abandi. Abanyeshuri bashobora guhera aho biga bagirana impuhwe byaba guhumuriza bagenzi babo, kubafasha (nko kubaha udukoresho) bakabifashwamo n'ababyeyi, abarimu babo n'abandi hagamijwe ko abanyarwanda bose bagira ubuzima bwiza.
- **Ubwuzuzanye** : Abanyeshuri bazungurana ibitekerezo ku ruhare rwa buri wese mu kubaka igihugu cye. Basobanukirwe ko gukorera hamwe ari ingenzi kuko abishyize hamwe nta kibananira.
- **Koroherana** : Hazaganirwa ku muco wo koroherana bishingiye ku kwihanganirana no guca bugufi igihe umuntu agiranye n'undi ikibazo kuko kutoroherana bishobora gukurura ingorane zirimo gukomereka, inzika, ubwicanyi n'ibindi.

- **Gusaba imbabazi** : Abanyeshuri bazaganirizwa ku muco wo gusaba imbabazi n’akamaro kabyo, basobanukirwe ko igihe cyose hari ukosereje mugenzi we agomba kugira ubutwari bwo gutera intambwe akamusaba imbabazi. Gusaba imbabazi ni ngombwa ku ikosa ryakozwe iryo ariryo ryose niyo waba warikoze ntawe ukureba, kuko iyo udasabye imbabazi umutima wawe nta mahoro uba ufite.
- **Gutanga imbabazi** : Abanyeshuri bazaganirizwa ku muco wo gutanga imbabazi n’inyungu zirimo. Abana bagasobanukirwa n’inzira zo gutanga imbabazi arizo : Kwemera kubanza kumva uwagukoshereje ukamugirira impuhwe ; kugendera kuri izo mpuhwe ukirengagiza ibibi yagukoreye ; Kumwakira no kwihanganira ibibi yagukoreye kuko ari umuntu ; kumugarurira icyizere no kwemera ko ashobora gukora ibyiza.
- **Kudaheza** : Abanyeshuri bazaganira ku ruhare rwa buri muntu mu kubaka umuryangonyarwanda, yaba umwana cg umukuru, umugabo cyangwa umugore, ufite ubumuga cyangwa cyangwa utabufite nta n’umwe ukwiye guhezwa cyangwa kwiheza mu gufatanya n’abandi. Bazasobanukirwa ko bose ari Abanyarwanda kandi ko bose bagomba gusenyerera umugozi umwe mu kubaka igihugu.
- **Gutega amatwi** : Abana bazaganira ku muco mwiza wo guha umwanya ibyo babwirwa, bakabiha agaciro ; haba mu masomo yabo ya buri muni cyangwa mu buzima busanzwe aho baba bari hose.
- **Kubaha abakuru** : Abanyeshuri bazungurana ibitekerezo ku muco wo kubaha muri rusange ariko by’umwihariko ku cyubahiro bagomba abakuru. Bazacengerwa n’akamaro k’impanuro z’abakuru kuko bazivomamo byinshi bibafasha kuba Abanyarwanda babereye u Rwanda.

II. AMASHURI YISUMBUYE N'AY'IMYUGA

1. GAHUNDA Y'UKO IBIGANIRO BIZAKORWA (UMWAKA W'AMASHURI WA 2017)

Hakurikijwe ingengabihe y'amashuri mu mwaka w'amashuri wa 2017, ibiganirompaka mu mashuri yisumbuye n'ay'imyuga bizakurikiza gahunda ikurikira:

IGIHEMBWE CYA MBERE

Insanganyamatsiko ya mbere :

Ukwezi kwa mbere kw'igihembwe cya mbere :

**Ikiganiro : UBUNYARWANDA N'UBWENEGIHUGU
(National Identity)
(Igice cya 1 cy'ikiganiro)**

1. Aho u Rwanda ruherereye n'Abaturage barwo

- 1.1. U Rwanda nk'igihugu
- 1.2. Ibiranga Repubulika y'u Rwanda
- 1.3. Imitegekere y'igihugu cy'u Rwanda

2. Ubwenegihugu nyarwanda

- 2.1. Umunyarwanda
- 2.2. Ishingiro ry'Ubwenegihugu nyarwanda
 - 2.2.1. Uko buboneka
 - 2.2.2. Uko butakara
- 2.3. Uburenganzira n'inshingano by'umwenegihugu
 - 2.3.1. Uburenganzira
 - 2.3.2. Inshingano

Ukwezi kwa 2 kw'igihembwe cya mbere:

**Ikiganiro : UBUNYARWANDA N'UBWENEGIHUGU
(National Identity)**

(Igice cya 2 cy'ikiganiro)

3. Ubunyarwanda

3.1. Inkingi z'ubunyarwanda

3.1.1. Ururimi rw'ikinyarwanda

3.1.2. Indangagaciro z'umuco nyarwanda

3.1.3. Ibizirizwa mu kubaka ubunyarwanda

3.2. Ndi Umunyarwanda

IGIHEMBWE CYA 2

Insanganyamatsiko ya 2

Ukwezi kwa mbere kw'igihembwe cya 2:

Ikiganiro : IMIBANIRE Y'ABANYARWANDA MU MATEKA YABO

(Igice cya mbere cy'ikiganiro)

II.1. Imibanire mbere y'ubukoloni

1. Umuco n'imyemerere

2. Ubukungu

3. Kwagura igihugu

4. Amoko y'Abanyarwanda

5. Itorerero n'urubohero

Ukwezi kwa 2 kw'igihembwe cya 2:

Ikiganiro : IMIBANIRE Y'ABANYARWANDA MU MATEKA YABO

(Igice cya 2 cy'ikiganiro)

II.2. Imibanire mu gihe cy'ubukoloni

1. Isenyuka ry'umuco nyarwanda (n'ibirangamuco)
n'imyemerere n'indangagaciro

2. Isenyuka ry'imiyoborere n'imitegekere y'igihugu

3. Inyigisho z'ivangura n'amacakubiri

4. Ivuka ry'amashyaka

Ukwezi kwa 3 kw'igihembwe cya 2:

Ikiganiro : IMIBANIRE Y'ABANYARWANDA MU MATEKA YABO
(Igice cya 3 cy'ikiganiro)

II.3. Imibanire muri Repubulika ya mbere n'iya 2

1. Imitegekere ishingiyeye ku ivangura
2. Irondakoko, irondakarere n'iringaniza
3. Ikandamizwa n'ihuzwa ku byiza by'igihugu
4. Ihohotera ry'uburenganzira bwa muntu n'ubuhunzi
5. Jenoside yakorewe Abatutsi

II.4. Imibanire y'Abanyarwanda nyuma ya Jenoside

► *Insanganyamatsiko ya 3*

Ukwezi kwa 4 kw'igihembwe cya 2:

Ikiganiro: JENOSIDE N'INGENGABITEKEREZO YAYO, IPFOBYA N'IHAKANA N'UBURYO BWO KUBIRWANYA

1. Ibyiciro (steps/etapes) by'itegurwa rya Jenoside
2. Ibyaha byibasira inyoko muntu
3. Amateka ya Jenoside ku isi
4. Jenoside yakorewe Abatutsi mu Rwanda n'ingaruka zayo
5. Ipfohya n'ihakana rya Jenoside yakorewe Abatutsi
6. Ingamba zo kurwanya ipfohya n'ihakana rya Jenoside yakorewe Abatutsi

IGIHEMBWE CYA 3

► *Insanganyamatsiko ya 4*

Ukwezi kwa mbere kw'igihembwe cya 3:

Ikiganiro: INZIRA Y'UBUMWE N'UBWIYUNGE MU RWANDA

(Igice cya mbere cy'ikiganiro)

1. **Ubumwe n'ubwiye mu mibanire y'abantu**
2. **Ubumwe n'ubwiye mu Rwanda**

- 2.1. Ishingiro (karemano) ry'ubumwe bw'Abanyarwanda
- 2.2. Isenyuka ry'ubumwe bw'Abanyarwanda
- 2.3. Ingaruka z'isenyuka ry'ubumwe bw'Abanyarwanda

3. Urugendo rwo gusana ubumwe bw'Abanyarwanda

- 3.1. Guhagarika Jenoside yakorewe Abatutsi
- 3.2. Guverinoma y'ubumwe bw'Abanyarwanda
- 3.3. Gucyura impunzi no kuzituzza
- 3.4. Guca ivangura no guha amahirwe angana abenegihugu
- 3.5. Gushyiraho inzego zimakaza uburenganzira no guca akarengane
- 3.6. Gushyiraho Itegeko Nshinga n'andi mategeko ashya imbere ubumwe bw'Abanyarwanda
- 3.7. Ishyirwaho rya Politiki y'Ubumwe n'Ubwiyunge

Ukwezi kwa 2 kw'igihembwe cya 3:

Ikiganiro: INZIRA Y'UBUMWE N'UBWIYUNGE MU RWANDA

(Igice cya 2 cy'ikiganiro)

4. Inkingi z'ubumwe n'ubwiyunge

- 4.1. Imiyoborere myiza
- 4.2. Ubutabera
- 4.3. Ubukungu
- 4.4. Umutekano n'imibereho myiza

5. Inzitizi zikigaragara mu nzira y'ubumwe n'ubwiyunge

6. Ingamba zo guteza imbere ubumwe n'ubwiyunge

- 6.1. Ubukangurambaga
- 6.2. Kuvoma mu muco nyarwanda ibisubizo ku bibazo
- 6.3. Ubushakashatsi
- 6.4. Kubaka ubufatanye n'izindi nzego
- 6.5. Gushimira Abanyarwanda batatatiye igihango cy'ubunyarwanda:
Ndi Umunyarwanda/Abarinzi b'Igihango

7. Uruhare rw'urubwiruko mu guteza imbere ubumwe n'ubwiyunge

► *Insanganyamatsiko ya 5*

Ukwezi kwa 3 kw'igihembwe cya 3:

Ikiganiro : GUKUMIRA, GUHOSHA NO GUKEMURA AMAKIMBIRANE MU MURYANGO NYARWANDA

1. Ibitera amakimbirane
2. Ubwoko bw'amakimbirane
3. Inzego z'amakimbirane
4. Uko amakimbirane yigaragaza
5. Uburyo bwo gusesengura amakimbirane
6. Ingaruka zayo
7. Uburyo bwo gukumira no gucyemura amakimbirane

8. Amakimbirane yigaragaza mu muryango nyarwanda

- 8.1. Ibibazo bishingiye ku bukene
- 8.2. Ibibazo bishingiye ku ngaruka za Jenoside
- 8.3. Ibibazo bishingiye ku mitungo
- 8.4. Ibibazo bishingiye ku buharike

ICYITONDERWA :

Iyi gahunda yateguwe hashingiye ku ngengabihe y'umwaka w'amashuri wa 2017 ariko ibiganiro bizakomeza gutangwa no mu myaka itaha ku buryo bukurikira :

| No | UKWEZI | MU MASHURI YISUMBUYE |
|----|------------------------------|---|
| 1 | Ukwezi kwa mbere kw'amasomo | Ubunyarwanda n'ubwenegihugu (igice cya mbere) |
| 2 | Ukwezi kwa kabiri kw'amasomo | Ubunyarwanda n'ubwenegihugu (igice cya kabiri) |
| 3 | Ukwezi kwa gatatu kw'amasomo | Imibanire y'Abanyarwanda mu mateka yabo(igice cya mbere) |
| 4 | Ukwezi kwa kane kw'amasomo | Imibanire y'Abanyarwanda mu mateka yabo(igice cya kabiri) |

| | | |
|---|---------------------------------|--|
| 5 | Ukwezi kwa gatanu kw'amasomo | Imibanire y'Abanyarwanda mu mateka yabo(igice cya gatatu) |
| 6 | Ukwezi kwa gatandatu kw'amasomo | Jenoside n'ingengabitekerezo yayo, ipfoby, ihakana n'uburyo bwo kubirwanya |
| 7 | Ukwezi kwa karindwi kw'amasomo | Inzira y'ubumwe n'ubwiyunge mu Rwanda (igice cya mbere) |
| 8 | Ukwezi kwa munani kw'amasomo | Inzira y'ubumwe n'ubwiyunge mu Rwanda (igice cya kabiri) |
| 9 | Ukwezi kwa cyenda kw'amasomo | Gukumira, guhosha no gukemura amakimbirane mu muryango nyarwanda. |

2.UBURYO BWO KUYOBORA IBIGANIRO

Mu rwego rwo kuyobora ibiganiri, umuhuza w'ibiganiri azifashisha uburyo bwo kuyobora ibiganiri muri rusange ariko kuko abanyeshuri biga mu mashuri yisumbuye n'ay'imyuga bari ku nzego z'imyumvire zitandukanye, kuri buri cyiciro hazajya hiyongeraho uburyo bwihariye.

2.1. UBURYO BWO KUYOBORA IKIGANIRO MURI RUSANGE

2.1.1. Gufasha abanyeshuri kumva no gusobanukirwa insanganyamatsiko

- **Gusembura ibiganiri**

umuhuza w'ibiganiri azasembura ibiganiri akoresheje bumwe mu buryo bukurikira:

- Kwerekana ibishushanyo biri bufashe abitabiriye ibiganiri kuvumbura insanganyamatsiko
- Kubabwira agakuru cyangwa kubacira umugani bibafasha kugera ku nsanganyamatsiko
- Kubereka filimi, gutangiza indirimbo bibafasha kuvumbura insanganyamatsiko
- Gutangiza agakino (role play)

- Kubabaza ibibazo ku nsanganyamatsiko ugamiye kugirango wumve uko bayumva
- Kwemeranya ibyo mugiyeye kuganiraho (hari igihe ubwabo baba babivumbuye cyangwa umuhuza w'ibiganiro akabibagezaho).

- **Kubagezaho no kudasobanurira neza intego z'ikiganiro**

Umuhuza w'ikiganiro asobanurira neza abanyeshuri intego y'ikiganiro, akabasaba kuza gutanga ibitekerezo ku nsanganyamatsiko bisanzuye.

- **Kubagezaho insanganyamatsiko no kudasaba kuyitangaho ibitekerezo** (*mbere y'uko umuhuza w'ibiganiro asobanura insanganyamatsiko abaza abitabiriye ikiganiro icyo bayiziho n'uko bayumva akaba aribyo aheraho abuzura anabasobanurira*)

- Kwandika/ kuvuga insanganyamatsiko
- Gusobanura insanganyamatsiko mu buryo bugari muri rusange no mu Rwanda by'umwihariko
- Gutanga ibitekerezo ingingo ku yindi bigakorerwa mu matsinda cyangwa muri rusange.

2.1.2. Gushyira abanyeshuri mu matsinda no kudasobanurira icyo bagiye gukora

- **Gutanga ibitekerezo**

Bamaze gusobanukirwa insanganyamatsiko, hakorwa amatsinda agahabwa ibibazo bimwe cyangwa bitandukanye biganisha kuri ya nsanganyamatsiko. umuhuza w'ibiganiro agakurikirana uruhare rwa buri wese mu matsinda mu gutanga ibitekerezo. Amatsinda ahabwa iminota 45 yo kungurana ibitekerezo. Buri tsinda ryitoramo umuyobozi waryo n'umwanditsi. Umuhuza w'ibiganiro akurikirana imirimo yo mu matsinda akagenda abasobanurira abagarura ku nsanganyamatsiko.

Icyitonderwa: Iyo hatakoreshajwe amatsinda, insanganyamatsiko iganirwaho n'abitabiriye ibiganiro bose muri rusange bari hamwe, bakayunguranaho ibitekerezo nyuma umuhuza w'ibiganiro akabikusanya, akabigorora bigafasha abaganiriye kugira imyumvire imwe kandi iboneye.

- **Gukusanya ibitekerezo byavuye mu matsinda:**

- Buri tsinda rigaragariza abandi ibyo ryagezeho.
- Abagize andi matsinda babaza ibibazo ku byo bamaze kugezwaho, bakunganirana mu kubisubiza ku buryo n'abo mu yandi matsinda bashobora kubunganira cyangwa kubuzuzwa.
- Amatsinda akurikirana bitewe n'uko yagabanyijwe, uko byifujwe cyangwa uko bishobora kuzuzanya
- Umuhuza atanga umwanzuro ndetse akaba yakongeraho ibitavuzwe.

2.1.3. Kubaza abanyeshuri icyo ikiganiro kibasigiye

Umuhuza w'ikiganiro abaza abanyeshuri ibibazo bituma bagaragaza inyigisho batahanye nyuma agatanga incamake y'ikiganiro ashingiye ku ntego y'ikiganiro akanatanga isomo abagikurikiye bagomba gutahana.

2.1.4. Guha abanyeshuri umukoro wo gutahana

Abari mu biganiro basabwa kujya gusangiza abandi icyo bakuyemo, babakangurira kwimakaza aho bari hose umuco w'amahoro, ubworoherane, gushyira imbere ubunyarwanda himakazwa ubumwe n'ubwiyunge bw'Abanyarwanda.

2.2. UBURYO BWO KUYOBORA IKIGANIRO MURI BURI CYICIRO

Dukurikije ikigero cy'abanyeshuri biga mu kigo cy'amashuri yisumbuye biragoye kubahuriza bose mu kiganiro kimwe kubera ko batanganya imyaka n'ibitekerezo, abakuru bashobora kuvuga abato bagatinya. Ibyiza ni uko bashyirwa mu byiciro bibiri (2): icyiciro cya mbere kikajyamo abana bo mu mwaka wa 1,2,3 naho icya kabiri kikajya abo mu wa 4,5,6.

Mu gutangira hashobora gukoreshwa filimi cyangwa indirimbo biganisha ku nsanganyamatsiko.

Umuhuza w'ibiganiro ageza ku banyeshuri insanganyamatsiko n'itege y'ikiganiro nyuma bagashyirwa mu matsinda hakurikijwe umwaka bigamo bagatanga ibitekerezo ku nsanganyamatsiko. Buri tsinda ryitoramo uriyobora n'umwanditsi. Nyuma abanyeshuri bahurizwa hamwe bagasangizanya ibyo bagezeho mu matsinda ku nsanganyamatsiko bahawe. Umuhuza w'ibiganiro arabikusanya, akabigorora bigafasha abaganiriye kugira imyumvire imwe kandi ibonereye.

Icyitonderwa: Abanyeshuri bo mu mwaka wa 4,5,6 mu mashuri yisumbuye bahabwa insanganyamatsiko ibyumweru bibiri mbere y'uko ikiganiro kiba, bakayikoraho ubushakashatsi, bakazahuriza hamwe ibyo bagezeho ku munsu w'ikiganiro nyirizina igihe baba bagiye gukorera mu matsinda. Nyuma y'ikiganiro kandi batahana umukoro wo kujya guhimba imivugo cyangwa indirimbo biganisha ku nsanganyamatsiko baganiriyeho. **Mu mashuri yisumbuye ikiganiro ntikigomba kurenza amasaha 2.**

Umuhuza w'ibiganiro ashobora gukoresha ubundi buryo bwose butavuzwe bushobora gutuma abanyeshuri barushaho kumva insanganyamatsiko no gutanga ibitekerezo kugira ngo itege y'ikiganiro igerweho.

3.IBIGANIROMPAKA KU BUMWE N’UBWIYUNGE MU MASHURI YISUMBUYE N’AY’IMYUGA MU RWANDA

Mu mashuri yisumbuye n’ay’imyuga, iyi nyoborabiganiro igizwe n’insanganyamatsiko zikurikira:

1. U Rwanda, ubwenegihugu nyarwanda, ubunyarwanda
2. Imibanire y’Abanyarwanda mu mateka yabo
3. Jenoside n’ingengabitekerezo yayo, ipfobya n’ihakana n’uburyo bwo kubirwanya
4. Inzira y’ubumwe n’ubwiyunge mu Rwanda
5. Gukumira, guhosha no gukemura amakimbirane mu muryango nyarwanda

► INSANGANYAMATSIKO YA I

U RWANDA, UBWENEGIHUGU NYARWANDA, UBUNYARWANDA

0.Intego

Muri rusange ibiganiro bishingiye kuri iyi nsanganyamatsiko bigamije kongerera abanyeshuri ubumenyi rusange k’u Rwanda, gukunda u Rwanda no kugira ishema ryo kuba Abanyarwanda.

By’umwihariko, ibiganiro bizarangira abanyeshuri bashobora:

- gutandukanya igihugu cyubakiye ku bumwe bw’abaturage (Nation State) n’Igihugu cy’abaturage bahujwe n’inzego z’imitegekere gusa (State), hashingiwe ku rugero rw’u Rwanda;
- gusobanura ibiranga Repubulika y’u Rwanda;
- gutandukanya umunyarwanda n’ubunyarwanda;
- kugira ishema rishingiye kuri Ndi Umunyarwanda.

1. Iriburiro

U Rwanda ni Igihugu gifite ubuso bungana na kilometero kare ibihumbi makumyabiri na bitandatu na magana atatu na mirongo itatu n’umunani (26.338km²), rukaba ruherereye mu mutima w’Afurika aho rukikijwe n’ibindi bihugu kuburyo rudakora ku nyanja. Umubano mwiza rufitanye n’abaturanyi utuma rugera ku

nyanja bitagoranye kandi iterambere ry'ikoranabuhanga riruhiza n'isi yose ku buryo bwihuse. Abaturage b'u Rwanda bagera kuri miliyoni 12, ni Abanyarwanda bafite ubwenegihugu nyarwanda. Isano ibahuza n'ishema basangiye ryo kuba Abanyarwanda bakomeye ku gihugu cyabo bituma bashyira imbere “Ndi Umunyarwanda” kuko ariko biyumva kandi bibona mu Rwanda rwabo.

U Rwanda rufite akarusho karuhiza na benerwo (Abanyarwanda) kuko barusangiye, bagahuzwa n'umuco umwe n'amateka amwe. U Rwanda n'Abanyarwanda ni izingiro ry'ubunyarwanda kuko utabona aho ubitandukanyiriza kubera urwo rusobe rw'ibihuza abaturage barwo barusangijwe n'amateka n'umuco wabo. Abanyarwanda bafite inshingano yo kururinda no kurukorera batiganda.

2. Ibisobanuro by'amagambo

2.1. Igihugu / U Rwanda

2.1.1. U Rwanda nk'Igihugu

Igihugu ni ubutaka buzwi bufite imipaka, ubuyobozi n'ibiburanga bizwi (inzego, ubutegetsi n'amategeko), butuwe n'abaturage bafite ibibahuza bizwi ku rwego mpuzamahanga. Hashingiwe ku rugero rw'u Rwanda, igihugu (Nation) ni umuryango mugari w'abantu utuye ku butaka bumwe, uhuje amateka, ururimi, umuco n'ubutegetsi.

2.1.2. Leta / State


Leta ni urwego rwa Politiki ruzwi rukorera ahantu hazwi, hari abaturage bazwi kandi bayoborwa narwo ku buryo buzwi.

Igihugu / Nation state: u Rwanda ni Igihugu kirangwa na Leta ifite umurongo wa Politiki, gifite ubusugire bwacyo n'abaturage basangiye amateka, umuco, indangagaciro zibaranga.

U Rwanda rukaba rwarabaye Igihugu (nation) mu kinyejana cya 14 nyuma yo kwaguka mu buso, mu miryango yari irugize no guhamba imitegekere yarwo yemewe.

U Rwanda rwavukiye i Gasabo (Umurenge wa Rutunga/Akarere ka Gasabo) rugenda rwaguka bishingiye ku kwihuza, kwishyira hamwe no gutsura ubucuti n'ibindi bihugu byari birukikije mu bwumvikane. Ubundi buryo bwakoreshejwe ni intambara zo kwigarurira ibindi bihugu byanze kwihuza n'u Rwanda ku neza. Ibi u Rwanda rwabigezeho kuko rwari rufite uburyo bw'imiyoborere inoze (umwami, abiru, abatware n'abakuru b'imiryango), ishuri ritoza gukunda Igihugu no kukitangira, umuco n'indangagaciro ziwushyigikiye (Itorerero) n'ingabo zishinzwe kururinda no kururwanirira.

Mbere y'umwaduko w'abazungu mu 1895, u Rwanda rwari rwagutse birenze uko ruteye ubu nyuma yaho abazungu bigabanyije ibihugu by'Afurika. Ikarita ikurikira igaragaza ibice byari birugite.



Muri iki gihe u Rwanda ni igihugu gifite ubuso n'imbibi zihamye rwakebewe n'abakoloni (26,338km²), abaturage bagera kuri miliyoni 12, rufite ubutegetsi buhamye kandi bwemewe n'amahanga. U Rwanda ruyobowe mu buryo bwa Repubulika igendera ku mahame ya demokarasi.



3. Ibiranga Repubulika y'u Rwanda

U Rwanda rufite ibirango Abanyarwanda bibonamo, bubaha, kandi birwubahisha mu ruhando mpuzamahanga.

Ibiranga igihugu cy'u Rwanda nk'uko tubisanga mu ngingo ya 9 y' Itegeko Nshinga rya Repubulika y'u Rwanda ryo mu 2003 ryavuguruwe mu 2015 ni ibi bikurikira:

- **Ibendera** rigizwe n'amabara akurikira: uvuye hasi uzamuka habanza ***ibara ry'icyatsi kibisi***, rikurikirwa n'***ibara ry'umuhondo***, kandi ayo mabara yombi yihariye icya kabiri cy'ibendera ryose. Igice cya kabiri cyo hejuru kigizwe n'***ibara ry'ubururu rishushanyijwemo izuba n'imirasire yaryo y'ibara ry'umuhondo wa zahabu*** riri ku ruhanda rw'iburyo. Iryo zuba n'imirasire yaryo bitandukanyijwe n'uruziga rw'ibara ry'ubururu.



Ingingo ya 5 y'itegeko No 34/2008 ryo kuwa 08/08/2008 risobanura amabara agize Ibendera ry'Igihugu mu buryo bukurikira:

Icyatsi kibisi:

Gisobanura icyizere cy'uburumbuke hakoreshejwe neza imbaraga z'Abanyarwanda n'ibiri mu Rwanda.

Umuhondo:

Usobanura ubukungu. Abanyarwanda bagomba guhagurukira umurimo kugira ngo bagere ku bukungu burambye.

Ubururu:

Busobanura umunezero n'amahoro. Abanyarwanda bagomba guharanira amahoro azabageza ku bukungu burambye n'umunezero.

Izuba n'imirasire by'umuhondo wa zahabu:

Bisobanura urumuri rugenda rwiyongera rumurikira bose. Byerekana ubumwe, gukorera mu mucyo no kurwanya ubujiji.

- **Ikirango cya Repubulika** kigizwe n'uruziga rw'icyatsi kibisi n'ipfundo ry'umugozi w'iryo bara upfunditse hasi, ahagana hejuru hakabamo inyandiko "REPUBULIKA Y'U RWANDA ". Minsi y'ipfundo handitse amagambo agize intego ya Repubulika "UBUMWE, UMURIMO, GUKUNDA IGIHUGU". Izo nyandiko zose zanditse mu nyuguti z'umukara ku ibara ry'umuhondo.

Ikirango cya Repubulika kigizwe kandi n'amashusho akurikira: izuba, imirasire yaryo, ishaka n'ikawa, agaseke, uruziga rw'ubururu rufite amenyo n'ingabo ebyiri, imwe iri iburyo indi iri ibumoso.



Ingingo ya 7 y'Itegeko No 34/2008 ryo kuwa 08/08/2008 isobanuro ibigize Ikirango cya Repubulika mu buryo bukurikira: **Uruziga rufite ibara ry'icyatsi kibisi n'ipfundo rimwe**, bivuga ikimenyetso cy'ubumwe bw'Abanyarwanda bose bibumbiye hamwe, kandi batahiriza umugozi umwe;

Izuba n'imirasire makumyabiri n'ine (24), bivuga gukorera mu mucyo no kurwanya ubujiji;

Ishaka rifite ihundo n'ibibabi bine (4) n'ikawa ifite ibibabi cumi na bitandatu (16) n'imbutu makumyabiri n'umunani (28), bivuga umusaruro unyuranye ugizwe n'ibihingwa ngandurarugo n'ibihingwa ngengabukungu;

Agaseke gapfundikiye k'amabara abiri, bivuga umuco w'Abanyarwanda wo gukomeraho, kuzigama, gufatanya muri byose no gusangira;

Uruziga rw'amenyo makumyabiri n'ane ariko cumi n'icyenda (19) ari yo agaragara kandi rufite ibara ry'ubururu, bivuga ikimenyetso cyo guharanira ikoranabuhanga n'iterambere ry'inganda mu Rwanda;

Ingabo ebyiri, imwe iri iburyo, indi ibumoso, bivuga gukunda Igihugu no kukirinda. Abanyarwanda bose hamwe, mu bumwe, barinze ubusugire bw'Igihugu cyabo kandi biteguye kukirengera; **Intego ya Repubulika**: Ubumwe, Umurimo, Gukunda Igihugu: ni intego buri Munyarwanda agomba guhora azirikana kugira ngo yumve ko Igihugu cye agisangiye n'Abanyarwanda bose, ko agomba kugiteza imbere yitabira umurimo, ko agomba kugikunda no kucyitangira.

- **Indirimbo y'Igihugu ni: RWANDA NZIZA**

1. Rwanda nziza gihugu cyacu

Wuje imisozi, ibiyaga n'ibirunga
Ngobyi iduhetse gahorana ishya.
Reka tukurate tukuvuge ibigwi
Wowe utubumbiye hamwe twese
Abanyarwanda uko watubyaye
Berwa, sugira, singizwa iteka.

2. Horana Imana murage mwiza

Ibyo tugukeshya ntibishyikirwa:
Umuco dusangiye uraturanga
Ururimi rwacu rukaduhaza
Ubwenge, umutima, amaboko yacu
Nibigukungahaze bikwiye
Nuko utere imbere ubutitsa.

3. Abakurambere b'intwari

Bitanze batizigama
Baraguhanga uvamo ubukombe
Utsinda ubukoloni na mpatsibihugu
Byayogoje Afurika yose
None uraganje mu bwigenge
Tubukomeyeho uko turi twese.

4. Komeza imihigo Rwanda dukunda

Duhagurukiye kukwitangira
Ngo amahoro asabe mu bagutuye.
Wishyire wizane muri byose
Urangwe n'ishyaka, utere imbere
Uhamye umubano n'amahanga yose
Maze ijabo ryawe riguhe ijambo.

4. Imitegekere y'Igihugu cy'u Rwanda

Nk'uko byavuzwe haruguru, imitegekere y'u Rwanda ishingiyeye kuri Repubulika n'iyubahirizwa ry'amahame ya demokarasi. U Rwanda rwahisemo kubakira ku nzego z'ubutegetsi eshatu:

4.1. Ubutegetsi Nshingamategeko

Ubutegetsi Nshingamategeko bushinzwe Inteko Ishinga Amategeko igizwe n'Imitwe ibiri:

- Umutwe w'Abadepite, abawugize bitwa «Abadepite»;

- Umutwe wa Sena, abawugize bitwa «Abasenateri».

Inteko Ishinga Amategeko ijya impaka ku mategeko ikanayatora. Ishyiraho amategeko ikanagenzura imikorere ya Guverinoma mu buryo buteganywa n'Itegeko Nshinga.

4.2. Ubutegetsi Nyubahirizategeko

Ubutegetsi Nyubahirizategeko bushinzwe Perezida wa Repubulika na Guverinoma.

Guverinoma igizwe na Minisitiri w'Intebe, Abaminisitiri, Abanyamabanga ba Leta n'abandi bashobora kugenwa na Perezida wa Repubulika bibaye ngombwa. Minisitiri w'Intebe atoranywa, ashwirwaho kandi avanwaho na Perezida wa Repubulika. Abandi bagize Guverinoma bashwirwaho na Perezida wa Repubulika amaze kugisha inama Minisitiri w'Intebe.

Guverinoma ishyira mu bikorwa Politiki y'Igihugu Perezida wa Repubulika yumvikanyeho n'Inama y'Abaminisitiri.

Guverinoma ibazwa ibyo ikora na Perezida wa Repubulika n'Inteko Ishinga Amategeko. Uburyo Guverinoma ibazwamo ibyo ikora n'Inteko Ishinga Amategeko buteganywa n'Itegeko Nshinga.

4.3. Ubutegetsu bw'Ubucamanza

Ubutegetsu bw'Ubucamanza bushinzwe Urwego rw'Ubucamanza rugizwe n'inkiko zisanzwe n'inkiko zihariye. Inama Nkuru y'Ubucamanza ni rwo rwego rukuriye Ubutegetsu bw'Ubucamanza. Ishyiraho imirongo migari igenga imiyoborere y'Ubutegetsu bw'Ubucamanza.

Itegeko rigena imitunganyirize, ububasha, inshingano n'imikorere by'Inama Nkuru y'Ubucamanza. Iryo tegeko rigena kandi abayigize (Perezida w'Urukiko rw'Ikirenga, Minisiti w'ubutabera, Umuvunyi mukuru, Perezida wa Komisiyo y'Igihugu y'Uburenganzira bwa Muntu, Umukuru w'Urugaga rw'abunganira abandi mu mategeko...). Ubutegetsu bw'Ubucamanza burigenga kandi bufite ubwisanzure mu micungire y'abakozi n'imari.

5. Ubwenegihugu Nyarwanda

5.1. Umwenegihugu/ Umunyarwanda

Umwenegihugu ni umuntu utuye mu gihugu kuburyo buhoraho (muri rusange), akagira uburenganzira bungana n'ubw'abandi muri icyo gihugu, agahabwa amahirwe angana n'ayabandi ku byiza by'Igihugu kandi akagira n'inshingano zishyirwaho n'amategeko. Ubu burenganzira ni inshingano abigira ku bandi benegihugu no ku gihugu. Ibi bigatuma agira n'uruhare mu kucyubaka.

Umunyarwanda ni umuntu wese ufite ubwenegihugu nyarwanda. Ubwenegihugu ni ibiranga umwenegihugu bishingiye ku uburenganzira n'inshingano umwenegihugu agira imbere y'abo basangiye Igihugu no ku gihugu ubwacyo. Ku Banyarwanda ubwenegihugu bwabo ni ubwenegihugu nyarwanda.

Umunyarwanda afata u Rwanda nk'umubyeyi, umurezi, ingobyi n'umurage, akarangwa no gukunda u Rwanda n'Abanyarwanda no

guharamira icyaruteza imbere. ***Abanyarwanda mu gihugu cyabo kuva cyera bafite ibyo basangiye bibahuza birimo igihugu kimwe, umuco umwe, ururimi rumwe, amateka amwe, umwami umwe n'ishema ry'uko u Rwanda rutera ntiruterwe.***

5.2. Ishingiro ry'ubwenegihugu Nyarwanda

Bitabangamiye Itegeko Nshinga n'andi mategeko yihariye, umuntu wese uhawe ubwenegihugu Nyarwanda nk'uko biteganywa n'amategeko, afite uburenganzira n'inshingano byose by'Umunyarwanda uhereye igihe abuherewe.

Bimwe mu byo ufite ubwenegihugu runaka agomba kuzirikana:

- **Guha agaciro umwenegihugu basangiye Igihugu:** Guha agaciro abandi, ubwubahane n'ubworoherane mu benegihugu mu rwego rwo kubahiriza ikiremwa muntu hatezwa imbere imibanire myiza no kwirinda amakimbirane.
- **Kuba umwenegihugu mwiza:** Kubaha no kubahisha amategeko akoresha mu gihugu no kugira umuhate wo kuzuzwa inshingano hatezwa imbere imibereho myiza ya buri wese.
- **Ubufatanye:** Gushyira hamwe mu cyerekezo gihuriweho n'abenegihugu bose no kwiyumva mu muryango mugari w'abo musangiye ubwegihugu hazirikanwa isano muhuriyeho.

5.2.1. Uko ubwenegihugu buboneka

Uko ubwenegihugu buboneka mu Rwanda biteganywa n'Itegeko Nshinga rya Repubulika y'u Rwanda ryo mu 2003 ryavugururwe mu 2015 mu ngingo ya 25 igira iti "Buri Munyarwanda afite uburenganzira ku gihugu. Nta Munyarwanda ushobora gucibwa mu gihugu cye.

Buri Munyarwanda afite uburenganzira ku bwenegihugu nyarwanda. Ubwenegihugu burenze bumwe buremewe. Ntawe ushobora kwamburwa ubwenegihugu nyarwanda bw'inkomoko. Abantu bose bakomoka mu Rwanda n'ababakomokaho bafite uburenganzira bwo guhabwa ubwenegihugu bw'u Rwanda, iyo babisabye”.

Itegeko ngenga no 30/2008 ryo ku wa 27/07/2008 ryerekeye ubwenegihugu nyarwanda rigena uko ubwenegihugu nyarwanda buboneka.

Risobanura ibi bikurikira: ubwenegihugu nyarwanda bushingiye ku gukomoka ku Munyarwanda (Umubyeyi umwe cyangwa bombi) ni ubwenegihugu nyarwanda bw'inkomoko.

Ubwenegihugu nyarwanda bushobora gutangwa hashingiwe kuri ibi bikurikira:

- Ubushingiye ku kuvukira mu Rwanda;
- Ubushingiye ku ishyingirwa;
- Ubuturutse ku kugirwa umwana, (adoption);
- Ubushingiye ku kugirwa Umunyarwanda (ingingo ya 14 iteganya ibisabwa kugira ngo umunyamahanga agirwe Umunyarwanda).

5.2.2 Uko Ubwenegihu butakara

Itegeko riteganya ibijyanye no kureka, kwamburwa no gusubirana ubwenegihugu mu ngingo zaryo za 18, 19 na 20.

Ntawe ushobora kwamburwa ubwenegihugu nyarwanda bw'inkomoko.

Icyakora umuntu ashobora kwamburwa ubwenegihugu nyarwanda butangwa, iyo:

- yahawe cyangwa yasubiranye ubwenegihugu nyarwanda ku buryo buteganyijwe n'amategeko, ariko akoresheje amayeri, imvugo ibeshya, inyandiko irimo ikinyoma cyangwa igize icyo iyobamo, ruswa yo kugura umwe mu bagize uruhare mu mihango yubahirizwa cyangwa ubundi buriganya;

-yasabye kandi agahabwa ubwenegihugu nyarwanda agambiriye kugirira nabi Igihugu.

Uretse ibiteganyijwe mu gice cya mbere cy'igika cya 2 cy'iyi ngingo, ubwenegihugu ntibushobora kwamburwa iyo bishobora gutuma ubwatswe asigara nta bwenegihugu afite.

Kwamburwa Ubwenegihugu Nyarwanda bikurikiranwa n'ubushinjacyaha mu rukiko rubifitiye ububasha rw'aho uregwa atuye cyangwa aba, iyo habaye impamvu zishobora gutuma abwamburwa. Urubanza rugomba kuba rwaciwe mu gihe kitarenze amezi atatu (3) ikirego gitanzwe.

Ubushinjacyaha n'uregwa bafite uburenganzira bwo kujurira nk'uko amategeko asanzwe abiteganya.

Igihe urubanza rwambura ubwenegihugu rwaciwe burundu, igice cyarwo cyerekeye ibyemezo gitangazwa mu Igazeti ya Leta ya Repubulika y'u Rwanda bisabwe n'Ubuyobozi Bukuru kandi bikamenyeshwa ibiro by'irangamimerere by'aho ubwambuwe yanditse.

5.3. Uburenganzira n'inshingano by'umwenegihugu

ITEGEKO NGENGA N° 30/2008 RYO KU WA 25/07/2008

RYEREKEYE UBWENEGIHUGU NYARWANDA

Mu ngigo yaryo ya 5 "Bitabangamiye Itegeko Nshinga n'andi mategeko yihariye, umuntu wese uhawe ubwenegihugu Nyarwanda nk'uko biteganywa n'amategeko, afite uburenganzira n'inshingano byose by'Umunyarwanda uhereye igihe abuhereye".

6. Ubunyarwanda

Ubunyarwanda ni umutimanama nyarwanda uhuriweho n'Abanyarwanda batwaye u Rwanda ku mutima, wubakiye ku isano-muzi Abanyarwanda basangiye no ku nshingano n'uburenganzira bahuriyeho. Ni nabwo shingiro rya Ndi Umunyarwanda ijyana no kwiyumvamo isano ihuza Abanyarwanda

batewe ishema ryo kuba Abanyarwanda bahuriye ku gukunda u Rwanda, kururinda no kuruteza imbere.

Ubunyarwanda ni imibereho ituruka mu rusobe rw'ibiranga Abanyarwanda bibagenera umwihariko wabo ubaranga ntibitiranywe n'abandi. Ibyo ni igihugu, abaturage, imyemerere, umuco, ururimi, ubuyobozi n'amategeko atuma bamererwa neza. Ubunyarwanda ni imyumvire iranga umunyarwanda irenze kugira ubwenegihugu nyarwanda gusa.

6.1. Inkingi z'ubunyarwanda

- Ururimi rw'ikinyarwanda

Abahanga bemeza ko mu bihe bya kera mu gace u Rwanda ruherereyemo hari higanje indimi eshatu (Soudanaise, Nilotique & Cauchtique) zishobora kuba arizo zavuyemo indimi zikoreshwa muri iki gihe mu karere n'ikinyarwanda kirimo.

Ikinyarwanda ni ururimi Abanyarwanda bose bahuriyeho ariko runakoreshwa no mu bihugu bituranye n'u Rwanda kubera amateka yavuzwe haruguru y'uburyo imipaka y'ibihugu yagiyeho hatitawe ku miturire y'abaturage.

Ururimi rw'ikinyarwanda ni kimwe mu biranga umuco nyarwanda nubwo ari n'imwe mu nzira wigaragarizamo. Birakwiye ko Abanyarwanda bamenya neza ururimi rwabo.

- Indangagaciro z'umuco nyarwanda

Indangagaciro z'umuco nyarwanda nizo zubatse ubunyarwanda bigatuma buzisumba.

Ubunyarwanda burenze kuba indangagaciro kuko indangagaciro z'umuco nyarwanda buzihatse zose bukagirwa na zose uko zingana, bukaziha ireme n'impamvu yo kubaho.

Dushingiye ku muco nyarwanda, amateka y'u Rwanda n'icyerekezo u Rwanda rwiyejeje, zimwe mu ndangagaciro ubunyarwanda bwubakiyeho zikanabukomeza zikubiye mu mbonerahamwe ikurikira:

| NO | Indangagaciro remezo | Indangagaciro zizishamikiyeho |
|-----------|--|--|
| 1 | <p><i>Gukunda Igihugu</i> <i>Gukunda Igihugu ni gukunda benecyo n'abagituye nta vangura, gukunda ibikigize byose birimo ururimi n'umuco, ubutaka kibarizwaho, kumenya amateka yacyo , kubumbatira umutekano n'ubusugire bwacyo, kugira ishyaka ryo kukirwanirira ku kiguzi icyo ari cyo cyose.</i></p> | <p>Ubwitange; kugira ishyaka n'ishema; kubaha umuryango; kurinda no gucunga neza ibya rubanda; kwagura amarembo; kwitabira ibikorwa rusange; kubungabunga umutekano; kurwanya ruswa; kubahiriza amategeko.</p> |
| 2 | <p><i>Ubumwe</i> <i>Imigenzereze y'abaturage bemera ko basangiye ubwenegihugu, umuco , amateka , inshingano n'uburenganzira mu gihugu cyabo ; barangwa n'ubwizerane , ubwubahane, n'ubufatanye mw'iterambere ryabo n'iry'Igihugu muri rusange.</i></p> | <p>Gukumira no kurwanya ingengabitekerezo ya Jenocide; ubworoherane n'umuco w'amahoro/koroherana; kubaha ubuzima; ubufatanye; kubana neza; gutabarana; ubusabane.</p> |
| 3 | <p><i>Ubupfura</i> <i>Ubupfura ni imico myiza igororokera abandi irangwa n'ubudahemuka, umutima w'impuhwe n'imbabazi, kutirata, kwanga umugayo no kwitwararika kuri byose no kuri bose. Impfura ni iyo musangira ntigucure, mwaganira ntikuvemo, waterwa ikagutabara wapfa ikakurerera. Ni ikira ntiyirate , yakena ntihemuke.</i></p> | <p>Kugira umutima; urugwiro; kwicisha bugufi ; kubana neza; ubwitonzi/ubushishozi; kutaba umunyamusozi; kunyurwa; kwiyoroshya; kujya inama; gushima; kwitsinda.</p> |

| | | |
|---|---|--|
| 4 | <p>Ubutwari <i>Ni kugira umutima udatinya gushyigikira ikiza , kugaragaza ikibi no guhangara kukirwanya wemeye ingaruka zose byakugiraho.</i></p> | <p>Kutagamburuzwa n'ibibazo; kureba kure; kwanga no kurwanya akarengane; kugira ubumuntu; kwihangana; (Izindi ndangacaciro zijyanye no gukunda Igihugu nk'ubwitange, kugira ishyaka n'ubushishozi ... n'izijyanye n'ubupfura).</p> |
| 5 | <p>Ubwangamugayo(Ubunyanga mugayo) <i>Ni uguhora wirinda icyagutera icyasha, cyaba giturutse mu mvugo mu myitwarire cyangwa mu migirire.</i></p> | <p>Kuba umunyakuri no gushyira mu gaciro; kubaha igihango, indahiro n'ijambo; ubudahemuka; kubaha ubuzima no kwiyubaha; gutega amatwi no kujya inama; kwiramira.</p> |
| 6 | <p>Gukunda umurimo no kuwunoza <i>Ni ukurangwa no gukorana ubuhanga, gukorera ku ntego, gukorera ku gihe, kugwiza umusaruro w'ibikorwa bikoze neza no guhora mu irushanwa ryo guhanga ibishya birushaho guteza izindi ntabwe mu iterambere n'imibereho myiza.</i></p> | <p>Gukorera ku ntego; kugira umwete; kwibwiriza; gukorera mu mucyo; kwigira; gukorana ubuhanga; gukora umurimo unoze kandi ufite ireme; gukorera ku gihe.</p> |

Ukunda iwabo ahazirikana iteka, akaharinda icyago akanahagwiza ibyiza.

Ingobyi iduhetse ni iy'agaciro, turayishinze twese."Aho ujishye igisabo ntuhatera ibuye". "Ndi Umunyarwanda" isaba Abanyarwanda bese guhora bashaka ukuri ariko bakabikorana ubworoherane nta guhutaza, bakemera aho bagize intege nke bakabisabira imbabazi bagamije kujya imbere.

- **Ibiziririzwa mu kubaka ubunyarwanda**

Mu rwego rwo kurinda indangagaciro zivuzwe haruguru, kirazira: gusumbisha inyungu bwite inyungu rusange; kugambanira Igihugu no kugira ingengabitekerezo ya Jenoside.

6.2. Ndi Umunyarwanda

Ndi Umunyarwanda: "Ni ukwiyumvamo isano ihuza Abanyarwanda batewe ishema no kuba Abanyarwanda bahuriye ku gukunda u Rwanda, kururinda no kuruteza imbere." Ndi umunyarwanda ishinga imizi mu bunyarwanda bwubakiye ku buryo umunyarwanda yibona, yiyumva, yitwara kandi akanisanga mu Rwanda no mu Banyarwanda.

Mu gusobanura ubunyarwanda, Madamu wa Nyakubahwa Perezida wa Repubulika Jeannette KAGAME yagize ati "Kuba Umunyarwanda si ugutura u Rwanda gusa, kabone n'ubwo kuvuka i Rwanda bitanga uburenganzira busesuye kandi bureshya kuri iyo ngobyi dusangiye.

Kuba Umunyarwanda ni ukugira ingengabitekerezo y'ubunyarwanda : The Rwandan Spirit. Ni ukwemera kuba uw'u Rwanda, rukaba urwawe, mu mateka, mu muco, mu migirire n'imitekerereze, mu cyerekezo n'intego, no mu buryo dutunganya imiyoborere kandi tukikemurira ibibazo".

"Ndi Umunyarwanda ni no kwiyumvamo imbaraga zica imigozi ikiziritse bamwe mu Banyarwanda ku macakubiri, zigapfundika ipfundo ry'ubwizerane, ubworoherane, uburengazira bungana kuri bose, ukwishyira ukizana mu gihugu no kuzirikana ko Igihugu ari byose bigatera buri wese kugikunda no kugikorera nta gusigana".

UMUSOZO

U Rwanda ni umurage w'Abanyarwanda bose.

Abanyarwanda basangiye u Rwanda n'umuco ubaranga byubakiyeho ubunyarwanda butwambika imbaraga mu byo dukora, bukatwubahisha imbere y'amahanga. Dore amasomo abanyeshuri bakura mu kiganiro:

- Guha agaciro umuco nyarwanda;
- Gucukumbura amateka y'u Rwanda mu bushakashatsi;
- Kuba imboni za Ndi Umunyarwanda aho bari hose;
- Kwihesha agaciro ubwabo no kugahesha Igihugu cyabo aho bari hose;
- Guhoza u Rwanda ku mutima;
- Kuvuguruza mu kinyabupfura ababyeyi gito bakiboheye ku ngoyi y'amacakubiri bakanayatoza abyiruka.

Nta Munyarwanda uhejwe k'u Rwanda kandi ntawe utarufitemo uburenganzira n'inshingano zo kururinda no kuruteza imbere.

► INSANGANYAMATSIKO YA II

IMIBANIRE Y'ABANYARWANDA MU MATEKA YABO

0.Intego

Muri rusange ibiganiro bishingiye kuri iyi nsanganyamatsiko bigamije kongerera abanyeshuri ubumenyi ku mibanire y'Abanyarwanda mu mateka yabo.

Nyuma y'ibi biganiro abanyeshuri bashobora:

- Gusobanukirwa n'uko Abanyarwanda babanaga mbere na nyuma y'ubukoloni kugeza ubu;
- Gusobanukirwa n'ibyashenye imibanire y'Abanyarwanda;
- Gusobanukirwa n'ingaruka byagize mu mibanire y'Abanyarwanda;
- Gukumira no kwirinda ibintu byose bitanya Abanyarwanda

1.Iriburiro

Abanyarwanda kuva kera bakundaga Igihugu cyabo, bari bazi ko Igihugu ari kimwe kandi bagisangiye, barangwaga n'ubumwe budatana. Abanyarwanda baharaniraga ishema ry'Igihugu cyabo ndetse bakakirwanirira, bari bafite imitwe y'Ingabo zari zishinzwe kurinda Igihugu ndetse no kucyagura.

U Rwanda ruri mu bihugu bike muri Afrika bitaremwe n'abakoloni. U Rwanda rwari rwujuje ibyangombwa byose bigize Igihugu: abaturage biyumva k'abenegihugu, ubutaka (territoire) bufite inkiko zizwi, ubutegetsi buyoboze icyo gihugu ndetse n'ubudahangarwa.

Ubwo bumwe bwabarangaga bwagiye busenyuka mu gihe cy'ubukoloni aho bahinduye amateka y'u Rwanda ndetse urwango n'amacakubiri mu muryango nyarwanda bifata intera yagejeje kuri Jenoside yakorewe Abatutsi mu 1994.

2. Imibanire y'Abanyarwanda mbere y'ubukoloni

Mbere y'uko abakoloni bagera mu Rwanda, Abanyarwanda bari babanye neza, babanye mu mahoro, basangira byose. Abanyarwanda bose biyumvaga nk'abavandimwe, biyitaga bene Kanyarwanda, bakavuga ko u Rwanda ariyo ngobyi ibahetse. Babiterwaga n'uko bari bahuriye kuri byose: ururimi, umuco, amateka, iyobokamana, umwami, imihango, imigenzo, imiziririzo, ibitekerezo n'imigani.

Bari basangiye indangagaciro zimwe kandi bakazirwanira ishyaka: gukunda Igihugu, ubutwari, ubwitange, ubupfura, ukuri, gutabarana, gufashanya n'ibindi; bumvaga kimwe icyo bitaga kirazira. Bari bahuriye ku nyungu rusange zirengerwa n'abenegihugu bose.

2.1. Umuco n'imyemerere

- Umuco w'Abanyarwanda

Umuco w'Abanyarwanda mbere y'ubukoloni warangwaga no kuvuga ururimi rumwe, indangagaciro zo gukunda igihugu cyabo, ubunyangamugayo, urukundo, ishema ryo gukora imirimo ifitiye igihugu akamaro, gufashanya ndetse no kwita ku bafite intege nke. Abanyarwanda bari bafite ibyo baziririza (ibintu bibujijwe gukora, ubirenzeho akaba akosheje ndetse akanabihanirwa).

Bari bafite indirimbo, imbyino, ibihozo, inanga, ibyivugo, amahamba n'amazina y'inka biteye kimwe n'ubwo abafite umwuga umwe bahuriyeho hari igihe bagiraga imbyino n'indirimbo byihariye bijyanye n'uwo mwuga wabo.

- Imyemerere y'Abanyarwanda

Abanyarwanda bemeraga Imana imwe kandi bakemera ko ihorana nabo "Imana yirirwa ahandi igataha i Rwanda. Bagiraga imigenzo ya

kinyarwanda iherekeza uko kwemera kwabo nko kubandwa, guterekera n'ibindi. Iyo mico ishingiyeye ku migenzo n'imiziririzo yose yafashaga Abanyarwanda kwimika ubunyarwanda, kudatitira igihango bagiranaga ndetse no kuzuzanya. Ibyo byose byatumaga Abanyarwanda bagira ubumwe butajegajega.

2.2. Ubukungu

Mu Rwanda rwa mbere y'abakoloni, Abanyarwanda bari bafite ubukungu bushingiye k'ubuhinzi, ubworozi, ububumbyi n'ubucuzi. Abanyarwanda batungwaga n'umusaruro w'ibikorwa byabo byaba ari ibihingwa, ibikomoka ku nka n'ibindi.

Abanyarwanda muri icyo gihe bambaraga ibikomoka ku mpu z'inyamaswa ndetse n'indi myambaro yakomokaga ku biti.

2.3. Kwagura Igihugu

U Rwanda rwavukiye I Gasabo (ubu ni mu murenge wa Rutunga) rugenda rwaguka ndetse ruba rugari kurusha ubu. Umwami w'u Rwanda yagabaga ibitero hirya y'imbibi kugira ngo yagure igihugu cye kurushaho. Ibyo byakorwaga n'Imitwe y'Ingabo, zatojwe kandi zifite ishema ryo kurinda igihugu ndetse no kucyagura.

Uko u Rwanda rwagukaga niko abarutuye bakomezaga kugira ubumwe bwabo nk'Abanyarwanda.

Abami bagize uruhare rukomeye mu kwagura u Rwanda. Twavugaga: Ruganzu Bwimba, Kigeri Mukobanya, Ruganzu II Ndori, Kigeri II Nyamuhesha wigaruriye ibihugu byinshi kurusha abandi, niwe wari waragejeje u Rwanda muri Congo no muri Uganda.

Muri 1885 niho u Rwanda rwambuwe zimwe mu Ntara zarwo: Bufumbira, Ndorwa na Mpororo zometswe kuri Uganda; Rutshuru, Bunyabungo n'Idjwi zashyizwe kuri Congo Mbiligi.

2.4. Amoko y'Abanyarwanda

Mu muco wa kinyarwanda ubwoko bivuga abantu bafitanye isano ndetse bafite n'ikirangabwoko bihariye, gifatwa nk'ikimenyetso cyabo bwite, kibaranga (totem). Ibi kandi bitandukanye n'ibyo twita Abahutu, Abatwa, Abatutsi.

Amoko gakondo azwi ni 18: **Abasinga, Abazigaba, Abagesera, Abasindi, Ababanda, Abanyiginya, Abega, Abacyaba, Abungura, Abashambo, Abatsobe, Abakono, Abaha, Abashingo, Abanyakarama, Abasita, Abongera, Abenengwe.** Aya moko yose ahuriwemo n'abahutu, abatwa n'abatutsi. Ubushakashatsi buhamya ko impamvu ibitera ari uko ayo moko yabayeho mbere y'inyito y'abatwa, abahutu n'abatutsi kuko byadutse nyuma cyane yo kubaho kw'amoko gakondo, yabayeho mu kinyejana cya 1 nyuma y'ivuka rya Yezu. Naho inyito abahutu, abatwa n'abatutsi yavutse kandi yamamara mu gihe cya vuba, nko mu kinyejana cya 16, 17 na 18. Byatewe na « spécialisation » zinyuranye mu mirimo y'ubuhinzi, ubworozi no kubumba (NURC, Inyoborabiganiro kuri Ndi Umunyarwanda, Gashyantare 2015, p.37).

2.5. Itorerero n'urubohero

Itorerero n'urubohero byari irerero ry'abana b'abahungu n'abakobwa batangiyeye kugimbuka, bahurizwaga hamwe bakigishwa indangagaciro z'ubunyarwanda ndetse na za kirazira z'umuco nyarwanda.

Mu itorerero, abahungu bigishwaga imyitozo ngororamubiri, bagatozwa gukunda igihugu no kukirwanirira cyane cyane ko iyo babaga bamaze gukura ari bo bavagamo abajya mu mitwe y'ingabo zishinzwe kurinda no kwagura igihugu.

Mu rubohero, abakobwa batozwaga imirimo yo kuboha imisambi, ibiseke n'ibindi. Batozwaga kandi umuco w'isuku n'ikinyabupfura byose bagamije ko bazavamo ababyeyi beza babereye u Rwanda.

3. Imibanire y'Abanyarwanda mu gihe cy'ubukoloni

Igihe cy'abadage (1897-1916), umuzungu wa mbere wageze mu Rwanda ni Oscar Bauman (1892) yari Umunya-otirishya. Uwashoboye kwakirwa i Bwami i Kageyo, ni Comte Von Gotzen muri 1894. Ubukoloni bw'u Rwanda bwashimangiwe n'uwitwa Kapiteni Bethe wagiranye ibyo bise "amasezerano" y'ubukoloni n'ibwami muri 1899. Ayo masezerano yavugaga ko Ubudage buzategekana n'umwami Musinga u Rwanda rwe (protectorat).

Icyo gihe nibwo u Rwanda rwataye ubwigenge bwarwo, ruhinduka ubukoloni bw'amahanga. Muri 1910, abazungu b'abongereza, ababirigi n'abadage bagiranye amasezerano yo gukata imbibi z'u Rwanda n'ibihugu birukikije, u Rwanda rutakaza u Bufumbira n'ibice byose rwari rufite muri Congo.

Abadage bakoranye na Musinga bashimangira ubutegetsi bwe nyuma baje gutsindwa mu ntambara ya mbere y'Isi bava mu Rwanda muri 1916 basimburwa n'ababirigi.

3.1. Isenyuka ry'umuco nyarwanda (ibirangamuco), n'imyemerere n'indangagaciro.

Abakoloni bazanye imihango mishya, bazana ingengabitekerezo nshya n'indangagaciro bishya. Bahindura imyumvire, imitekerereze n'imibanire y'Abanyarwanda. Imico n'iyobokamana bishya byatumye Abanyarwanda bavuga ngo "Kiriziya yakuye kirazira".

Isenyuka ry'umuco nyarwanda, itorero n'urubohero byasimbuwe n'amashuri yigisha imico n'indangagaciro mvamahanga bisenya ubunyarwanda. Bavanyeho imyemerere nyarwanda bashyiraho imyemerere mvamahanga. Indangagaciro z'Abanyarwanda bazitesheje agaciro, Abanyarwanda batinyuka ibyo baziraga.

3.2. Isenyuka ry'imiyoborere n'imitegekere y'igihugu

Ubukoloni bwose aho buva bukagera ni ubutegetsu bukandamiza abenegihugu. Ubukoloni bw'ababirigi buri mu bintu by'ibanze byashenye u Rwanda cyane cyane mu birebana n'imyumvire, imitekerereze n'umuco byarwo. Bwabanje kvanaho ububasha bwose umwami yari afite nko kugaba imisozi, guca imanza, gutanga ibihano no kutavuguruzwa, bavanaho n'inzeho z'ubutegetsu n'ubwiru zamufashaga. Ibyo babonye bidahagije bacira umwami ishyanga.

3.3. Inyigisho z'ivangura n'amacakubiri

Mu bintu bikomeye abakoloni bazanye harimo kwigisha ko Abanyarwanda atari bamwe, batava hamwe kandi ko bataziye rimwe mu Rwanda. Bigisha ko badafite imiterere, imitekerere n'imico imwe.

Abakoloni basubiye mu miyoborere y'Igihugu muri 1926-1931: banyaga abahutu bari mu nzego z'ubuyobozi hafi ya bose, bagabira imiryango imwe y'abatutsi babayobotse. Abatutsi basigara bihariye ubutegetsu bahatswemo n'abakoloni.

Bagendeye kuri ibyo bashyizeho amashuri hamwe na hamwe yigwamo n'abatutsi ukwabo n'abahutu ukwabo. Nyuma haje kubaho ishuri ry'i Nyanza n'agashami k'abiga iby'ubutegetsu i Butare kigwagamo n'abatutsi bategurwaga kuzatwara.

Inkubiri y'ubwigenge itangiye muri Afrika, abari mu Nama nkuru y'Igihugu kandi hafi ya bose bari Abatutsi batangiye guharanira uburenganzira bwabo mu birebana n'ubuyobozi bw'igihugu mu nyandiko bise "Mise au Point". Abakoloni ntibabifashe neza, batangira gushyigikira itsinda ry'abahutu ryari rikuriwe na Kayibanda ari nabwo handitswe icyiswe « Manifeste y' Abahutu » muri 1957. Bavuga ko barengera Gahutu wakandamijwe na Gatutsi. Ironwabwoko rya politiki rirwanya Abatutsi ryavutse icyo gihe.

3.4. Ivuka ry'amashyaka ya Politiki

Muri 1959, Ababiligi batanze uburenganzira bwo gushinga amashyaka ya politiki. Iryabimbuye ni APROSOMA ryatangiye ari ishychirahamwe muri 1957, rihindurwamo ishyaka ku wa 15/2/1959. APROSOMA yatangiye yiyita ishyaka ry'abahutu.

Hakurikiyeho PARMEHUTU (26/9/1959) ikomotse kuri "Mouvement social Muhutu" yashinzwe muri Kamena 1956 na KAYIBANDA. PARMEHUTU yashingiye ku murongo wa politiki wo kurengera Abahutu gusa no kwikoma Abatutsi.

Andi mashyaka yashinzwe ni UNAR yashinzwe ku wa 3 Nzeri 1959. RUKÉBA Francois (Perezida) na Michel RWAGASANA (Umunyamabanga Mukuru). UNAR yaharaniraga ubwigenge busesuye.

Irindi ni RADER yashinzwe ku ya 14 Nzeri 1959 na Lazaro NDAZARO na Prosper BWANAKWELI.

4. Imibanire y'Abanyarwanda muri Repubulika ya mbere n'iya kabiri

Nyuma y'ubukoloni, ingengabitekerezo y'ivangura, iron-dabwoko ni yo yakomeje kuranga ubutegetsu bwa Repubulika ya mbere n'iya kabiri zakurikiye ubwigenge. Repubulika ya mbere (1962-1973) imaze kuvuka hashyizweho inzego nshya z'ubutegetsu zisimbura inzego zari zishingiye ku ngoma ya cyami.

4.1. Imitegekere ishingiye ku ivangura

Nyuma y'ubukoloni, ishyaka rya PARMEHUTU ryasigaranye umurage w'iron-dakoko binyuze mu mvururu zo mu w'1959-1962. Ibi bigaragarira mu mvugo z'abayobozi baryo nk'uko Kayibanda Gregoire waje no kuba Perezida w'u Rwanda yabishimangiye mu magambo ye agira ati: "U Rwanda ni igihugu kimwe kirimo bibiri. Abatuye ibi bihugu ntacyo bahuriyeho. Ntibahuje imico! Ababituye

bameze nk'abava ahantu hatandukanye cyangwa abaturage b'imigabane itandukanye". (Rutembesa, F. et al., Rwanda. Identite et citoyennete, Butare, 2003, p.128.)

Ibyo kandi byari mu mvugo no mu myandikire, aho uwitwa Gitera Joseph, umuyobozi wa Aprosoma, akaba yaranabaye umuyobozi w'Inteko Ishinga Amategeko, yanditse amategeko icumi y'abahutu mu mvugo ze zirangwa n'urwango yari afitiye abatutsi (NURC, Histoire du Rwanda: Des origines à la fin du XXe Siècle, 2011, pp397).

Muri make, ikibazo kinini Repubulika ya mbere yagize cyari umurongo wayo wa politiki (idewoloji yayo) yimakaza ironadabwoko n'amacakubiri.

4.2. Inyigisho n'ishyirwa mu bikorwa ry'ironadakoko, ironadakarere, iringaniza, n'ihuzwa

Repubulika ya kabiri (1973-1994) nayo yaje ishimangira ingengabitekerezo yari ishingiyeye ku ironadabwoko ndetse n'ironadakarere. Repubulika ya kabiri yashimangiye umurongo w'imiyoborere wa Repubulika ya mbere n'ubwo mu ntangiriro, mu mvugo n'indirimo, yavugaga ko iharanira amahoro n'ubumwe by'Abanyarwanda. Gusa, ntibyatinze kugaragara vuba ko icyo mvugo yari ikinyoma.

Politiki y'ivangura no guteranya Abanyarwanda mu gihe cya Repubulika ya mbere n'icya kabiri yakomeje kurangwa n'ibi bikurikira:

- gushimangira ibitekerezo n'imikorere y'ivangura rya gikoloni;
- gutoteza abatutsi no kubacira ishyamba, kubaheza mu buhunzi no kubaheza mu myanya y'ubuyobozi;
- kwica abatutsi bari mu gihugu igihe cyose impunzi ziri hanze ziteye igihugu zishaka gutaha; uretse ubwicanyi bwakorewe Abatutsi ndetse benshi bakirukanwa mu gihugu mu mwaka

w'I 1959 n'1963, abatutsi bakomeje kwicwa no kwirukanwa mu 1973, no kuva 1990 kugeza 1994;

- iringaniza mu mashuri no mu mirimo rishingiye ku moko n'uturere;
- gukoresha amoko n'uturere (Abakiga, Abanyenduga) nk'iturufu yo kugera no kugundira ubutegetsu ndetse no kwikubira ibyiza by'igihugu;
- gupfukirana ikibazo cy'uburenganzira bwa muntu ku bari imbere mu gihugu no kubuza impunzi gutaha mu Rwanda.

Muri make, bamwe mu bari ku butegetsu, haba kuri Repubulika ya mbere no kuri Repubulika ya kabiri, biyambuye ubunyarwanda biyambika ubuhutu. Ibi bibazo n'ibindi byinshi byagiye biranga imiyoborere idaha agaciro buri munyarwanda byashegeshe ubunyarwanda n'imibanire Abanyarwanda bari basangiye.

Ibi bibazo by'imitegekere ishingiyeye ku ivangura, irondakoko, irondakarere, iringaniza, ikandamizwa n'ihazwa ku byiza by'igihugu kwa bamwe, ubwicanyi no guheza bamwe mu banyarwanda mu buhunzi n'ibindi byinshi bibangamiye uburenganzira bwa muntu byarakomeje kugeza ubutegetsu bwa Repubulika ya kabiri buteguye bukanashyira mu bikorwa Jenocide yakorewe Abatutsi mu 1994.

4.3. Jenocide yakorewe abatutsi

Nyuma y'igihe kirekire Abanyarwanda bigishwa amacakubiri, ihazwa n'ikandamizwa, ivuka ry'imitwe y'abahezanguni (CDR, etc.), gucikamo ibice kw'amashyamba (Hutu Power), kudindiza amasezerano y'Arusha, ishyirwaho rya MINUAR muri 1993, urupfu rwa Perezida Habyarimana rwakoreshejwe nk'urwitwazo rwo gushyira mu bikorwa umugambi wo kurimbura Abatutsi wari warateguwe mbere unageragezwa ahantu hatandukanye mu Rwanda nko mu Bugesera na Kibirira.

Ubwicanyi bwatangiriye i Kigali bukwira vuba mu gihugu cyose. Inzego n'uburyo bwakoreshejwe mu gutsemba Abatutsi byerekana

ko umugambi wo gukora Jenoside wateguwe n'ubuyobozi bwa Leta, ushyirwa mu bikorwa n'inzego zayo: arizo abategetsi b'inzego z'ibanze, ingabo, abajandarume n'imitwe ubuyobozi bwari bwararemeye buyiha imyitozo n'ibikoresho bya gisirikari ndetse tutibagiwe n'itangazamakuru.

Abayobozi b'inzego nkuru za Leta barimo Perezida Sindikubwabo, Minisitiri w'intebe Kambanda n'abandi ba Minisitiri batanze intwaro kandi bazengurutse ibyari Perefegitura ya Butare, Gikongoro, Kibuye na Gitarama bakangurira abayobozi b'inzego z'ibanze n'abaturage kwica Abatutsi.

Jenoside yakozwe mu gihugu hose, ihitana miliyoni irenga y'Abatutsi. Uretse gutakaza abantu, abarokotse basigaye ari imfubyi, incike, abapfakazi, inkomere, abavanywe mu byabo n'impunzi zigera kuri miliyoni eshatu zahungiyeye mu bihugu bihana imbibe n'u Rwanda, igihugu cyasigaye ari amatongo mu bikorwa remezo ndetse n'ubukungu bw'igihugu muri rusange bwarahazahariye.

Abatutsi barishwe kugeza ku itariki ya 4 Nyakanga 1994 aho ingabo za RPF INKOTANYI zahagaritse Jenoside mu gihugu hose maze ku itariki ya 19 Nyakanga 1994 hagashyirwaho Leta y'Ubumwe bw'Abanyarwanda.

5. Imibanire y'Abanyarwanda nyuma ya Jenoside

Leta y'Ubumwe bw'Abanyarwanda imaze kujyaho, mu nshingano yari ifite harimo no kugarura ubumwe bw'Abanyarwanda hamwe no guhangana n'ingaruka za Jenoside yakorewe abatutsi mu 1994. Umuryango nyarwanda wari warasenyutse ku buryo butandukanye, imfubyi n'abapfakazi benshi, impunzi mu mahanga cyane cyane mu bihugu duturanye, ingengabitekerezo ya Jenoside, urwango, urwikekwe, ibikorwa remezo byarasenyutse, ubukene mu miryango ndetse n'igihugu muri rusange. Nyuma ya Jenoside icyizere cy'ubuzima ku banyarwanda cyari hasi cyane.

Guhera 1994, Leta y'Ubumwe igiyeho, hamaze gukorwa byinshi. Leta y'Ubumwe yashyizeho Politiki ziha icyerekezo cyiza igihugu, ikemura ibibazo byavuzwe haruguru mu buryo butandukanye: ifasha abacitse ku icumu, icyura impunzi zagiye mu 1994 na mbere yaho, yubaka ibikorwa remezo, ishyiraho ingamba zo kurwanya ubukene, ... ariko yita cyane cyane mu kunga no kubanisha Abanyarwanda.

Ubushakashatsi ku gipimo cy'ubwiyunge bw'Abanyarwanda bwakozwe na Komisiyo y'Ubumwe n'Ubwiyunge mu mwaka wa 2015 bwagaragaje ko Abanyarwanda babanye neza ku kigero cya 92,5% kivuye kuri 82,3% mu mwaka wa 2010 (NURC, Rwanda Reconciliation Barometer 2015).

Umusozo

Ubumwe bw'Abanyarwanda ni inkingi ya mwamba mu mibereho n'iterambere ry'Igihugu cyacu. Kuva kera Abanyarwanda babanaga neza, abakoronni baje batangira kubatanya, bahereye ku gutesha agaciro indangagaciro na kirazira z'umuco wabo. Repubulika ya mbere n'iya kabiri zashimangiye politiki yo gutanya Abanyarwanda, amacakubiri, irondakoko n'ihezwa ku byiza by'igihugu. Ibyo kandi byagejeje kuri Jenoside yakorewe abatutsi mu 1994.

Nyuma ya Jenoside, Leta y'Ubumwe bw'Abanyarwanda yashyizeho Komisiyo y'Ubumwe n'Ubwiyunge ifite intego yo kubaka u Rwanda rwunze ubumwe, Abanyarwanda bose bafite uburenganzira busesuye kandi bafatanyije mu miyoborere myiza y'igihugu no mu iterambere ryacyo (NURC, Politiki y'Igihugu y'Ubumwe n'Ubwiyunge, Kanama 2007).

Biragaragara ko hakiri intambwe zo gutera mu mibanire y'Abanyarwanda ariko kandi hari na byinshi byo kwishimirwa ku bimaze gukorwa.

INSANGANYAMATSIKO YA III

JENOSIDE N'INGENGABITEKEREZO YAYO, IPFOBYA , IHAKANA N'UBURYO BWO KUBIRWANYA

0. Intego:

Nyuma y'iki kiganiro, abanyeshuri bazaba bashobora:

- gusobanukirwa Jenoside icyo aricyo, uko itegurwa n'uko ishyirwa mu bikorwa;
- guharanira ko Jenoside itakongera kubaho ku isi;
- kwamaganira kure ibitera Jenoside byose cyane cyane irondakoko (racisme), ingengabitekerezo ya Jenoside (idéologie génocidaire) n'ibindi bimenyetso nshamarenga byose biganisha kuri Jenoside (Prévention)
- gusobanukirwa n'agaciro ko kwibuka hagamijwe ko Jenoside itazongera kubaho ukundi;
- gusobanukirwa n'amategeko ahana icyaha cya Jenoside no kurwanya umuco wo kudahana.

1. Ibisobanuro by'amagambo

1.1. Jenoside n'iki?

Nk'uko byanditse mu gitabo cya Samuel Totten and Paul R. Bartrop (ed), *The Genocide Studies Reader*¹, Ijambo « Jenoside » ryahanzwe n'umunyamategeko w'umuyahudi wabaga muri Pologne, Raphaël LEMKIN ashingiye ku ijambo ry'ikigereki "genos" rivuga ubwoko cyangwa inkomoko, hamwe n'iry'ikilatini "cāedere" risobanura kwica. Raphael Lemkin ashinga iri jambo yashakaga kwerekana itandukaniro riri hagati ya Jenoside n'ibindi byaha ndengakamere byibasira inyoko muntu (Crime contre l'humanité cyangwa Crime against humanity). Icyi cyaha gishingiye ku mugambi wo kurimbura burundu abantu bo mu bwoko, bo mu idini cyangwa batuye ahantu runaka. Ntabwo abantu barimburwa baba bazize y'uko bari ku rugamba cyangwa ngo bahorwe ibindi byaha. Ahubwo bahorwa

gusa icyo baricyo. Mu by'ukuri, abakora Jenoside nibo bashyiraho ibiranga abo bashaka kurimbura.

Amasezerano mpuzamahanga [(UN Convention on the Prevention and Punishment of the Crime of Genocide (UNCG))] yemejwe na ONU tariki ya 9/12/1948, ashirwa mu bikorwa tariki ya 12/1/1951, amaze kwemezwa n'ibihugu byose bigize uwo muryango, yavuze mu magambo yumvikanyweho (compromise) icyo Jenoside aricyo.

Yagize ati « Muri aya masezerano, Jenoside bivuga kimwe muri ibi bikorwa bikurikira bikoranywe umugambi wo kurimbura bose cyangwa igice cy'abantu bahuriye ku bwenegihugu (national), ubwoko (ethnic), ibara ry'uruhu (racial), idini.

1.2. Ingengabitekerezo ya Jenoside n'iki?

Igisobanuro tugisanga mu Itegeko no. 84/2013 ryo ku wa 11/09/2013 rihana icyaha cy'ingengabitekerezo ya Jenoside n'ibindi byaha bifatanywe isano nayo: "Igikorwa gikozwe ku bushake, kibereye mu ruhamo byaba mu magambo, mu nyandiko, mu mashusho cyangwa ku bundi buryo, cyatuma umuntu agaragaraho imitekerereze ishingiyeye ku moko, idini, ubwenegihugu cyangwa ibara ry'uruhu hagamijwe: kwimakaza ikorwa rya Jenoside no gushyigikira Jenoside.

1.3. Ingengabitekerezo ya Jenoside irangwa n'iki?

Irangwa n'umugambi wateguwe ukurikiwe n'ibikorwa bigamije kurimbura igice kimwe cy'abaturage cyangwa abaturage bose, bishingiyeye ku mpamvu z'ubwenegihugu, ubwoko, ibara ry'uruhu, cyangwa se idini. Iyi mitekerereze kandi ntirangirana no gukora Jenoside kuko na nyuma abayikoze n'abayishyigikiye bakomeza ibikorwa byo kuyihakana no kuyipfobya, ibi bikajyana n'ibindi bikorwa bigamije kuyisibanganya cyangwa kwibasira abayirokotse.

2. Ibyiciro by'itegurwa rya Jenoside:

Kugira ngo Jenoside ishoboke igomba kuba ishyigikiwe na Leta. Leta igira umugambi n'ubushake bisesuye (intention) byo gutsemba icyo gice cy'abaturage bayo kandi koko ikabishyira mu bikorwa. Leta itegura Jenoside ibikorera gahunda kandi ikayigeraho. Uwicwa ntazira icyo yakoze, azira gusa ko ari umwe mu bagize igice cy'abo baturage bagomba kurimburwa. Jenoside igira umurongo mugari igenderaho. Niwo uhuza abasangiye icyerekezo kimwe cyo gukora Jenoside. Uwo murongo mugari niwo bita ingengabitekerezo ya Jenoside.

Ingengabitekerezo ya Jenoside ikorerwa propaganda, igasakara mu bantu benshi, ikagira ingufu maze abantu bakayigenderaho bakemera gukora Jenoside.

Jenoside yose iba ifite uko yateguwe, ntitungurana. Ibyo bita ko bisa n'uburakari bw'abaturage biba bifite ibyabibanjirije, byigishijwe, kandi byateguwe neza. Kandi nibyo bifashisha mu gukora Jenoside.

3. Ibyaha byibasira inyokomuntu:

- Kwica abantu b'itsinda rimwe;
- Gukomeretsa bikabije imibiri cyangwa ibitekerezo by'abantu b'itsinda rimwe;
- Gushyira abantu b'itsinda rimwe mu buzima bubi ubigendereye, ugamiye ko barimbuka bose cyangwa igice;
- Gushyiraho uburyo bubuza iryo tsinda kubyara;
- Kwambura iri tsinda abana babo bagahabwa irindi ridafite aho bahuriye.

3.1. Ibyaha bifatanye isano n'ingengabitekerezo ya Jenoside

Ibyo byaha bigaragarira mu ngingo zikurikira:

- gushishikariza undi gukora Jenoside: ni igikorwa icyo ari cyo cyose gikozwe mu ruhame kigamije guhamagarira, koshya, gukangurira cyangwa guhatira undi muntu gukora Jenoside. Umuntu wese, ukora igikorwa kivugwa mu gika kibanziriza iki, aba akoze icyaha cyo gushishikariza undi gukora Jenoside;
- guhakana Jenoside: ni igikorwa icyo ari cyo cyose gikozwe ku bushake kandi mu ruhame kigamije: kuvuga cyangwa kugaragaza ko Jenoside atari Jenoside, kugoreka ukuri kuri Jenoside kugira ngo uyobye rubanda, kwemeza ko mu Rwanda habaye Jenoside ebyiri, kuvuga cyangwa kugaragaza ko Jenoside yakorewe Abatutsi itateguwe;
- gupfobya Jenoside: ni imyitwarire iyo ari yo yose igambiriwe kandi igaragajwe mu ruhame mu buryo ubwo ari bwo bwose, igamije: kugabanya uburemere cyangwa ingaruka ya Jenoside, koroshya uburyo Jenoside yakozwemo;
- guha ishingiro Jenoside: ni igikorwa icyo ari cyo cyose gikozwe ku bushake kandi mu ruhame kigamije: gushimagiza Jenoside, gushyigikira Jenoside, kwemeza ko Jenoside yari ifite ishingiro;
- guhisha cyangwa kwangiza ibimenyetso bya Jenoside cyangwa by'ibindi byaha byibasiye inyokomuntu: ni igikorwa icyo ari cyo cyose gikozwe ku bushake gitesha agaciro cyangwa gisibanganya ibimenyetso cyangwa amakuru byerekeye Jenoside cyangwa by'ibindi byaha byibasiye inyokomuntu;
- kwiba cyangwa kwangiza imibiri y'abazize Jenoside: ni igikorwa icyo ari cyo cyose gikozwe ku bushake kigamije gutwara bujura imibiri y'abazize Jenoside. Kwangiza imibiri y'abazize Jenoside ni igikorwa icyo ari cyo cyose gikozwe ku bushake kigamije gutesha agaciro imibiri y'abazize Jenoside;
- gusenya urwibutso cyangwa irimbi ry'abazize Jenoside: ni igikorwa icyo ari cyo cyose gikozwe ku bushake kigamije

gutesha agaciro, guhirika, kumanyura, konona irimbi cyangwa urwibutso rw'abazize Jenoside, ibimenyetso by'urwibutso cyangwa by'irimbi rya Jenoside cyangwa gukorera ibidakwiye ku rwibutso cyangwa ku irimbi ry'abazize Jenoside;

- guhohotera uwacitse ku icumu rya Jenoside: ni imyitwarire cyangwa igikorwa icyo ari cyo cyose gikozwe ku bushake, kigamije gutoteza, gutera ubwoba, gutesha agaciro, kwigamba, gushinyagurira, gutuka cyangwa kwangiza umutungo w'umuntu bishingiye ko ari uwacitse ku icumu rya Jenoside.

4. Amateka ya Jenoside ku isi

4.1. Jenoside y'Abarumeniya

Hagati y'imyaka 1915 na 1916, Abarumeniya bari hagati ya 1.000.000 na miliyoni ebyiri (2.000.000) bari muri Turikiya barishwe. Abasigaye bakomeje kwicwa kugeza muri 1923. Bishwe na Leta ya Turkiya. Babanje kuvanwa mu ngo zabo ku ngufu bajyanwa mu nkambi ziri mu butayu, baricwa. Abarokotse banyanyagizwa hirya no hino mu butayu, bahicirwa n'inzara n'inyota, baregwaga kuba ngo bagambanira Leta zabo. Leta ya Turkiya ntiyigeze yemera iyo Jenoside.

Muri 1975 niho Congrès y' Amerika yashyizeho umunsi wo kwibuka iyo Jenoside. ONU iyemera mu 1985. Inteko y'Uburayi iyemera mu 1987. Izindi Nteko zayemeye ni iy'Ababirigi, Canada, Ubufaransa n'izindi nke; Leta y'Ubufaransa yayemeye burundu kuri 18/1/2001.

4.2. Jenoside y'Abayahudi

Leta y'Abadage (Ille Reich) yakoze gahunda yo kurimbura imbaga y'Abayahudi igeze kuri 6.000.000 hagati ya 1938 na 1946. Bishwe n'Abanazi n'abandi babafashije mu Budage no mu Burayi bwose bwari bwigaruriwe na leta ya Hitler.

Irondakoko ryibasiye Abayahudi bita “antisémitisme” ni ryo rikuru cyane ryabaye mu madini, mu bukungu, muri politiki no mu muco. Leta ya Hitler niyo yari gize ingengabitekerezo ya Jenocide. Batangira kwirukanwa mu Budage, bamwe barahava. Abasigaye baricwa mu bihugu byose byari byatsinze: Pologne, Autriche, URSS, France, Pays - Bas, Belgique, Grèce, Yougoslavie n’ahandi. Jenocide y’Abayahudi yitwa “ SHOA” bivuga gutsembwatsembwa (destruction totale, destruction absolue, catastrophe écrasante).

Hari n’igihe bakoresha ijambo “ Holocauste”, bivuga gutangwaho igitambo (une immolation entièrement consommée). Ayo magambo ariko ashobora no gukoreshwa ku zindi Jenocide zabaye ahandi.

Abayahudi ndetse n’abandi bishwe n’abanazi bagiye bakusanyirizwa mu bigo, byitwa “camps de concentration”. Ariko hari n’ibindi byitwaga ibigo by’imirimo, hakaba ibindi byitwaga iby’imfungwa z’intambara, ndetse habaga n’ibyo bitaga iby’agateganyo. Hakaba ariko cyane cyane ibigo by’urupfu. Byose hamwe byari hafi 30.

Urupfu rw’umwihariko rw’abayahudi ni ukwicishwa uburozi bwa “Gaz” bafungiranaga abayahudi mu bikamyo bifungiranye hose, cyangwa mu byumba binini bifungiranye hose, bakoherezamo uburozi bw’umwuka wa GAZ (Zyklon - B) bagapfa nyuma y’iminota 15-20.

Abayahudi bicanywe n’abandi bantu batari abayahudi, bamwe bazize ibyo bakoraga, abandi kubera ibyo bangaga gukora cyangwa gusa kubera icyo baricyo. Abo ni nk’abakomunisti, abasosiyalisti, abaliberali, abasendikalisti, abitwa « homosexuels », abo mw’idini rya « Témoins de Jéhovah », abitwa « Tsiganes ».

Abandi bishwe ari benshi ni imfungwa z’intambara z’abasovietike: hishwe hafi 3.300.000.

Abandi bishwe ari benshi ni aba SLAVES bo muri U.R.S.S. no muri Pologne: hishwe hamwe hagati ya 19.000.700 na 24.000.000 y'abaturage. Abantu bose bazize Jenoside y'Abanazi bageze kuri 26.000.000, harimo 6.000.000 z'abayahudi, hagati ya 500.000 na 1.000.000 y'aba Tsiganes n'abandi bagizwe cyane cyane n'abaslaves.

4.3. Jenoside zindi: TIMOR-ORIENTAL, KOSOVO, CAMBODGE

TIMOR-ORIENTAL yamaze kwiyemeza ko yihaye "ubwigenge" muri 1975. Igihugu cya INDONESIA kirayitera kirayinesha muri 1976. Hicwa 1/3 cy'abaturage bose. Hishwe abagera ku 200.000. Abandi barabura bagera ku 170.000, ndetse abagore baterwa imiti ibabuza kubyara kandi babikorera batabizi.

KOSOVO: Leta ya Serbie iyobowe na Slobodan Milosevic yirukanye abo muri Kosovo bageze ku 980.000. Barahunga abandi baricwa bari hagati ya 50 na 100.000. Bamwe bicishijwe inzara, abandi intwari. Abagore n'abakobwa bagafatwa ku ngufu. Abicwaga bahambwaga mu byobo rusange, abandi bagatwikwa. Ubwicanyi bwo muri Kosovo bwitwa "nettoyage ethnique"

CAMBODGE: Leta y' abitwa "Khmers rouges" yishe abaturage bayo 1.800.000 hagati ya 1975 na 1979. Ubwo bwicanyi bwa Jenoside bwayobowe na POL POT. Wafashe ubutegetsi muri 1975.

Atangira kwirukana muri Phnon Penh abaturage bageze kuri 2.000.000. Igihugu cyose gihinduka nk'uburoko bw'abantu bagera kuri 8.000.000. Abapfuye, bagera kuri 1.800.000, bazize imirimo y'agahato, inzara, no gufatwa nabi bikabije. Leta ya POL POT yaje gutsindwa muri 1979. Ariko muri rusange igihugu cya Cambodge cyatakaje abantu bagera kuri 4.000.000 kuri 7.500.000 cyari gifite. Baguye mu Ntambara, bishwe n'inzara, bazize Jenoside n'ubundi bwicanyi bukabije.

Hagati ya 1970 na 1980, hapfuye hafi 3.300.000 y'abaturage. Abitwa ba "Khemers rouges" ubwabo bishe 2.400.000 z'abantu. Kugeza magingo aya, Jenocide yo muri Cambodge ntiremerwa.

5. Imiterere y'ingengabitekerezo ya Jenocide mu mahanga

Imiterere y'ingengabitekerezo ya Jenocide mu mahanga ishingiyeye cyane cyane mu guhakana no gupfobya Jenocide mu mvugo no mu bikorwa bya bamwe mu bantu banyuranye aribo: abanyapolitiki, abagize uruhare muri Jenocide bari hanze, abavuga ko bahunze Leta, abanyamahanga, abanyamakuru, abiyita abashakashatsi, bamwe mu bavuga ko bihayimana n'abo mu miryango mpuzamahanga yaba iya Leta n'itari iya Leta.

Mu bihugu by'amahanga bimwe hari ibintu bibiri bigaragaza ingengabitekerezo: guhakana no gupfobya Jenocide yakorewe abatutsi.

6. Jenocide yakorewe Abatutsi mu Rwanda n'ingaruka zayo

Uko ingengabitekerezo ya Jenocide yagaragaye mu Rwanda: mbere ya Jenocide, ubuyobozi bwariho bwimakaje politiki y'ivangura, amacakubiri n'akarengane, guhimbira abantu ibibaranga, gushyiraho amategeko icumi y'abahutu (Gitera na Kangura); ibinyamakuru (Kangura), Radiyo (RTL,.....), imvugo y'abanyapolitiki n'abandi bayobozi (Léon MUGESERA, KAYIBANDA, HABYARIMANA, BAGOSORA). Ibi byose byagize ingaruka zikomeye mu gihe cya Jenocide na nyuma yayo.

Ingaruka za Jenocide mu Rwanda:

- Gupfusha abantu barenze miliyoni kandi b'ingeri zose;
- Ubuhunzi bw'abarenze ½ cy'abari mu gihugu biganjemo abahungu kubazwa ibyo bakoze;
- Umutekano wahungabanyijwe n'abacengezi biganjemo abakoze Jenocide;

- Isura y'Igihugu n'abagituye yataye agaciro mu rwego mpuzamahanga;
- Imibanire y'Abanyarwanda yasubiye inyuma;
- Ihungabana n'ihahamuka ry'abarokotse Jenoside;
- Ibikomere bikomeye ku mibiri no ku mitima by'abarokotse Jenoside;
- Umubare munini w'abatishoboye (Inshike, imfubyi zibana, abapfakazi etc).
- Ubwandu bwa SIDA n'izindi ndwara byariyongereye;
- Abana bavutse ku babyeyi batabashaka kuko batewe inda n'abicanyi;
- Abasenyewe amazu n'indi mitungo;
- Ubukungu bw'Igihugu bwarahungabanye;
- Imfungwa nyinshi zirenze cyane ubushobozi bw'amagereza asanzwe kandi no kuzitunga bivuna Leta, izindi zikaba zifungwiwe mu mahanga n'ibindi.

7. Ipfobya n'ihakana bya Jenoside yakorewe Abatutsi.

Hari uburyo bwo guhakana no gupfobya Jenoside bugaragarira mu bikorwa n'imyitwarire bikurikira:

- kuvuga ko Jenoside itabayeho;
- kuyita andi mazina (amahano, ibyabaye, etc);
- kuvuga ko byari intambara, ubwicanyi;
- kuvuga ko Jenoside yatewe n'urupfu rw'uwaru Perezida wa Repubulika Habyarimana Juvenal;
- kuvuga ko habaye Jenoside ebyiri;
- kurwanya kwibuka;
- gufata nabi inzibutso;
- gutoteza no kwica abacitse ku icumu;
- gushyigikira ingengabitekerezo ya Jenoside;
- guhishira no guhisha ukuri kwafasha ubutabera;
- kwigisha no gushyigikira amacakubiri n'inzangano mu mashuri, mu madini, mu mashyaka ya politiki n'ahandi abantu bahurira;

- gufatanya no gutera inkunga abafite umugambi wo kongera gukora Jenoside.

Hari ibindi byaha bifitanye isano n'ingabitekerezo nabyo bihanirwa aribyo:

- kugoreka ukuri kuri Jenoside kugirango uyobye rubanda;
- kugabanya uburemere cyangwa ingaruka ya Jenoside;
- kworoshya uburyo Jenoside yakozwemo;
- guhisha cyangwa kwangiza ibimenyetso bya Jenoside n'ibindi byaha byibasiye inyokomuntu;
- kwiba cyangwa kwangiza imibiri y'abazize Jenoside
- gusenya urwibutso cyangwa irimbi ry'abazize Jenoside
- guhohotera uwacitse kw'icumu rya Jenoside

8. Ingamba zo kurwanya ipfoby n'ihakana rya Jenoside yakorewe abatutsi

- Kuyirinda (Prévention) binyuze mu bukungurambaga
- Guca umuco wo kudahana no gucira imanza abakoze Jenoside
- Gushyiraho ibigo bikora ubushakashatsi kuri Jenoside
- Gushyiraho amategeko ahana icyaha cya Jenoside n'ingabitekerezo yayo
- Gushishikariza ibindi bihugu kwibuka no gushyiraho amategeko ahana Jenoside yakorewe abatutsi n'amategeko ahana ingabitekerezo ya Jenoside, ihakana n'ipfoby byayo;
- Kwita ku muryango kugira ngo ube ishingiro ry'amahoro n'urubuga rwo kurandura ingabitekerezo ya Jenoside;
- Kugira urwego rw'uburezi umuyoboro nyamukuru w'ingamba zihashya ingabitekerezo ya Jenoside n'amacakubiri;
- Gukomeza gushimangira umutekano w'Igihugu;
- Kurushaho guhangana n'ingaruka za Jenoside hashyirwaho ikigega cy'indishyi ku barokotse Jenoside;
- Kwita ku bubanyi n'amahanga nk'umuyoboro wo kurwanya ingabitekerezo no kubaka amahoro arambye mu Rwanda;

- Kurwanya ubukene, guhanga imirimo no kongera ubukungu bw'Abanyarwanda
- Kwigisha no gushimangira ingamba zo kurandura ingengabitekerezo ya Jenoside;
- Kwibuka no gufata neza inzibutso

8.1. Amategeko ahana ingengabitekerezo ya Jenoside

- i. Itegeko Nshinga rya Repubulika y'U Rwanda ryo muri 2003 ryavuguruwe muri 2015, mu iranganshingiro ryayo rihamya ko Abanyarwanda biyemeje gukumira no guhana icyaha cya Jenoside, kurwanya ihakana n'ipfobyanya rya Jenoside, kurandura burundu ingengabitekerezo ya Jenoside n'ibyo igaragariramo byose, amacakubiri n'ivangura bishingiye ku moko, ku turere n'ibindi ibyongere byose.
- ii. Ingingo ya 10 y'Itegeko Nshinga ishyiraho amahame remezo leta y'u Rwanda igenderaho n'ayo iteganyaga mu gukumira no guhana icyaha cya Jenoside, kurwanya ihakana n'ipfobyanya rya Jenoside no kurandura burundu ingengabitekerezo ya Jenoside n'ibyo igaragariramo byose.
- iii. Amategeko n'amabwiriza bihana ibyaha byerekeye Jenoside mu Rwanda
 - Itegeko n° 18/2008 ryo ku wa 23/07/2008 rihana icyaha cy'ingengabitekerezo ya Jenoside
 - Itegeko N° n° 33 bis/2003 of 06/09/2003 rihana icyaha cya Jenoside, ibyaha byibasiye inyokomuntu n'ibyaha by'intambara
 - Itegeko N° 56/2008 ryo kuwa 10/09/2008 rigenga inzibutso n'amarimbi by'abazize Jenoside yakorewe abatutsi mu Rwanda;
 - Amabwiriza areba imyitwarire y'imitwe ya Politiki mu Rwanda
 - N'andi mategeko

9. Uko Jenoside zikorwa:

Ntabwo Jenoside zikorwa kimwe. Aho Jenoside zagiye ziba hose, ntabwo zagiye zikorwa kimwe. icyo zihuriraho ni uko zikorwa na leta ifite umugambi wo kurimbura igice kimwe cy'abaturage bayo. Uburyo n'inzira zo kubica biratandukanye, bumwe ni ubu:

- Kubicisha intwari ku bwinshi;
- Kubicisha inzara ari benshi;
- Kubabuzanya kubyara;
- Kubacaho urubyaro;
- Kubicisha indwara n'uburozi n'imyuka ihumanya.

10. Uko Jenoside zirwanywa

Iteka abakoze Jenoside bagarageza kuyihakana. Bagahakana ko yabaye, bagahakana uruhare rw'abayikoze, bagahakana ko leta yayikoresheje. Guhakana Jenoside bishobora gutuma yongera kubaho, ndetse kuyihakana bisa no kuyikomeza.

Hari ibikorwa byinshi byo kuyibuza kongera kubaho. Harimo kuyirinda, kuyibuka, amategeko n'amasezerano mpuzamahanga biyamagana, ubutabera n'ibindi.

- a) Kuyirinda: Kubuza Jenoside kubaho, bisaba kumenya hakiri kare impamvu ziyitera, hakabaho ingufu nyinshi zo kuvanaho izo mpamvu zitera Jenoside.

Hagomba guhagarika hakiri kare:

- impamvu zose ziheza abaturage mu byiza by'bihugu cyabo;
- impamvu zose zisumbanya abaturage, zishingiye ku cyo baricyo: idini, ubwoko, politike, n'ibindi;

- impamvu zose zamamaza irondakoko, irondakarere, ubwironde bwa bamwe, ingengabitekerezo zibiba inzangano n’amacakubiri;
- leta zikoresha ubutegetsu bw’igitugu n’izishingira ubutegetsu bwazo ku irondakoko n’ivangura icyo ryaba rishingiyeho cyose;
- igitera intambara cyose kuko kenshi Jenoside zikorwa mu ntambara;
- ibinyamakuru n’amaradiyo byamamaza inzangano;
- aho Jenoside itangiye gusa n’ikorwa hagomba gutabarwa vuba na bwangu.

b) Gucira imanza abakoze Jenoside

Abakoze Jenoside bagomba gucibwa imanza bagahanwa, bigaca intege abatekereza gukora izindi Jenoside. Amasezerano mpuzamahanga ku birebana na Jenoside yemera ko abakoze Jenoside bagomba gukurikiranwa mu gihugu cyabo cyangwa hanze y’igihugu cyabo. Yemera kandi ko icyaha cya Jenoside kidasaza.

Inkiko mpuzamahanga zizwi cyane ni:

- Urukiko Mpuzamahanga rwa Gisirikare rwa Nuremberg rwaciriye imanza abanazi bakoze Jenoside y’abayahudi.
- Urukiko Mpuzamahanga rw’icyahoze ari Yougoslavie rwagiriyeho gucira imanza abayobozi bateje Jenoside n’ibyaha by’intambara ndetse n’ibyibasiye inyokomuntu muri Yougoslavie.
- Urukiko Mpuzamahanga rw’Arusha rwashyiriweho gucira imanza abakoze Jenoside y’abatutsi.
- Urukiko rw’umwihariko rwavugwa mu Rwanda ni urukiko rwa GACACA. rushinzwe gucira imanza abakoze Jenoside mu Rwanda no kubaka ubumwe n’ubwiyunge bw’Abanyarwanda.

c) Kwibuka no gushyiraho inzibutso

Kwibuka Jenoside no gushyiraho inzibutso, bituma abantu batirara ngo bibagirwe Jenoside kuko bayibagiwe banakwibagirwa ibiyitera. Jenoside y'abayahudi niyo ifite inzu z'inzibutso nyinshi kandi henshi. Hari izubatse aho abayahudi baguye, mu nkambi z'urupfu. Hari iziri muri Autriche, muri France, mu Budage, muri Pologne, no muri Pays-Bas. Hari izindi zubatswe ahandi, nko muri ISRAËL (Yad Vashem), muri Amerika no muri Australiya.

Jenoside y'abarumeniya nayo ifite inzibutso ahantu hatandukanye nko muri Californie n'ahandi nko muri Arménie.

Mu Rwanda inzibutso ziriho zirubakwa: Gisozi, Murambi, Ntarama, Bisesero n'ahandi.

d) Ibigo bikora ubushakashatsi kuri Jenoside

Mu rwego rwo kumenya Jenoside, impamvu ziyitera n'uko yakwirindwa hari ibigo bikora ubushakashatsi bwihariye kuri Jenoside. Bimwe ni ibi:

- La Société pour les populations menacées, iri mu Budage
- La Commission de documentation sur le Cambodge, iri New-York muri Amerika.
- L'Institut sur l'Holocauste et le Génocide, iri i Jerusalem muri Israël.
- Institut pour l'étude du Génocide, iri New York muri Amerika.
- Le Centre pour les études comparatives du Génocide, iri Sydney muri Australie.
- L'Institut de Montréal pour les études du Génocide, iri muri Canada.
- International Alert, iri Londre mu Bwongereza
- Association des spécialistes du génocide

Ibi bigo byose bikora ubushakashatsi kuri Jenoside, ibiyitera n’uko yakwirindwa. Bikora kandi inyigisho zirebana na Jenoside na programu zo kuzigisha. Byandika ibitabo byinshi kubirebana na Jenoside, bigakora n’inama mpuzamahanga ku birebana na Jenoside.

Umwanzuro

Jenoside zabaye kuva kera, hirya no hino ku isi. Aho Jenoside yakorewe hose yabaga igamije kurimbura inyoko-muntu. Inyoko-muntu yose rero igomba gukangurirwa kurwanya Jenoside kuko nitayirwanya, ariyo ubwayo izazima.

Jenoside ni “processus”: ingengabitekerezo ya Jenoside iravuka, igakura, igashyirwa mu bikorwa, aribyo Jenoside. Leta izakora Jenoside irangwa n’ubushake ifite bwo kuzarimbura igice kimwe cy’abaturage bacyo. Ikagendera kuri uwo murongo. Ikabyinjiza mu nzego zose no mu baturage bayo. Abantu biga gutoteza abandi, kubatuka no kubica: bagenda babikora, bakabimenyera.

Jenoside ibera kenshi mu bihugu bifite ingorane z’ubukungu, za politiki cyangwa z’intambara. Ishoboka kuko iteka ibihugu birebera, ntibitabare, abayikora ntibagira ikibakomakoma. Ariko Jenoside ishobora kwirindwa. Bisaba ko hamenyekana neza ibiyiranga byose n’ibiyibanziriza n’uko “processus” yayo igenda ikura. Bigomba kwigwa no kwigishwa.

Mu Rwanda hakwiye gushyirwaho:

- Mu mashuri yose, Porogaramu yo kwigisha gukumira no kwirinda Jenoside
- Ikigo gikora ubushakashatsi kuri Jenoside, kikagirana umubano n’ibigo by’ubushakashatsi biri hirya no hino kw’isi;
- Komisiyo y’Igihugu yo kurwanya Jenoside nk’uko yateganijwe mw’Itegeko-Nshinga.

- Inzu, bita ndangamurage ya Jenoside y'Abatutsi mu Rwanda, n'ibindi.

Muri rusange hari Abanyarwanda n'abanyamahanga bafite ingengabitekerezo ya Jenoside kandi bakanayikwirakwiza bifashishije itangazamakuru, abitwa impuguke ku Rwanda n'ibiyaga bigari. Iyi mitekerereze n'imikorere bifite ingaruka mbi ku gihugu no ku mibanire y'abagituye.

► **INSANGANYAMATSIKO YA IV**

INZIRA Y'UBUMWE N'UBWIYUNGE MU RWANDA

0.Intego y'ikiganiro

Iki kiganiro gifite intego zikurikira:

- Gusobanukirwa n'Ubumwe n'Ubwiye mu Rwanda;
- Kumenya ibyaranze ubumwe bw'Abanyarwanda mu mateka y'Abanyarwanda;
- Gusobanukirwa n'ibyasenye ubumwe bw'Abanyarwanda;
- Gusobanukirwa n' urugendo rw'Ubumwe n'Ubwiye mu Rwanda;
- Kugaragaza ibimaze kugerwaho mu nzira y'Ubumwe n'Ubwiye;
- Kugaragaza inzitizi zikigaragara mu rugendo rw'Ubumwe n'Ubwiye;
- Kwerekana uruhare rwa buri munyarwanda cyane urubyiruko mu guteza imbere Ubumwe n'Ubwiye;
- Kumenya no kurwanya amacakubiri mu Banyarwanda;

1.Ibisobanuro by'amagambo

Ubumwe n'Ubwiyunge bushobora kugira ibisobanuro bitandukanye hakurikijwe ababisobanura. Muri rusange ibisobanuro bikurikira nibyo bikunze gukoreshwa:

- Ubwumvikane
- Ubwuzuzanye
- Amahirwe angana
- Kwiha agaciro no kugaha abandi
- Guhuza ibikorwa bifite inyungu rusange
- Kubahana no guhana amahoro
- Uburenganzira bungana ku banyagihugu

Ubwiyunge bwo bwumvikana muri ubu buryo:

- Gutinyukana
- Gutsinda ubwishishanye
- Gusabana imbabazi no kubabarira
- Kurenga ibyatandukanyaga abantu
- Kongera kubana neza nyuma yo kutumvikana

Dushingiye ku bivuzwe haruguru, ubumwe n'ubwiyunge mu buzima bwa buri muni byumvikana:

- Nk'ubupfura n'ubusabane bw'abanyagihugu;
- Ubutabera no guca akarengane;
- Icyizere cy'ejo hazaza gishingiye ku mahoro y'umutima, umutekano rusange n'imibereho myiza igera kuri buri wese.

Hiyunga nde na nde?

Hiyunga umuntu ku giti cye (kwiyunga n'umutima wawe, kwiyakira no kwakira ibyakubayeho), kuko umuntu ubwe ariwe ukomeza amateka y'amacakubiri akomora ku mateka ye n'ibitekerezo bimuboshye.

Kwiyunga n'umuryango nyarwanda kuko buri wese ni urugingo rw'umuryango waranzwe n'amacakubiri n'ingaruka zayo (kwiyunga n'abandi).

Hiyunga jyewe na mugenga w'ibintu byose (Imana) kuko amacakubiri n'ingaruka zayo binyuranya n'amahame yatumye ubwoko muntu bubaho. Ntabwo abantu baremewe kumarana ahubwo baremewe kubana neza ubwabo no kubana neza n'ibidukikije kugirango babyifashishe mu kunoza imibereho yabo (kwiyunga n'Imana n'ibidukikije).

Politiki y'Igihugu y'Ubumwe n'Ubwiyunge isobanura ubumwe n'ubwiyunge mu buryo bukurikira: *Ubumwe n'Ubwiyunge bw'Abanyarwanda byumvikana nk'imigenzereze y'abaturage bemera ko basangiye ubwenegihugu, umuco n'uburenganzira bungana, barangwa n'ubwizerane, ubworoherane, ubwubahane, uburinganire, ubwuzuzanye, ukuri, komorana ibikomere batewe n'amateka mabi bacyemo kugirango bashobore kwiteza imbere mu mahoro asesuye.»*

Ubumwe n'ubwiyunge ni urugendo rusaba igihe kirekire, ni ikivi kidafite aho kigarukira, bisaba guhozaho kuko impamvu zitera amacakubiri cyangwa amakimbirane zihoraho

Ni ngombwa ko abantu bahora biteguye, birinda ibyasenya umuryango kandi aho ibibazo bibonetse bigakemurwa ku gihe.

2.Ubumwe bw'Abanyarwanda mu mateka

Mbere y'umwaduko w'abazungu, Abanyarwanda bari babanye neza, Abahutu/Abatutsi/Abatwa babagaho mu Rwanda ariko ntibyari amoko nk'uko byaje guhindurwa n'abazungu, bikanakoreshwa ku buryo bufuditse hashingiwe ku nyungu za politike y'ivangura.

Abanyarwanda bahuriraga ku moko gakondo ariyo: abasindi, abasinga, abagesera, abanyiginya, abega, abazigaba, abacyaba, abakono, n'ayandi ariko nta bwoko bwabaga umwihariko ku Bahutu, Abatutsi cyangwa Abatwa; bose bayahuriragaho. Abanyarwanda bari basangiye umwami, ururimi rumwe, rukaba ingobyi ihetse umuco wabo, bakagira imyemerere imwe, bagiraga

ubumwe, umwanzi cyangwa umubisha yatera u Rwanda aturutse hanze, Abanyarwanda bagafatanya kumurwanya, rukiwa u Rwanda rutavogerwa, bakarangwa n’ishema n’ubutwari, bagahurira ku migenzo, imihango n’imiziririzo imwe.

Abanyarwanda kandi bahuriraga mu Ngabo no mu Itorero ryari nk’ishuri bigiragamo kuba Umunyarwanda uhamye, bakiga ibimuranga n’ibizira, bikarushaho gushimangira ubunyarwanda no gukunda igihugu. Ibyo byiciro byahuriraga kandi ku nzego z’imiyoborere y’Igihugu nk’umutware w’umukenke, uw’ubutaka n’uw’ingabo.

Amakimbirane yose yabayeho mu Rwanda mbere y’ubukoloni, ndetse n’intambara zabaye icyo gihe ntabwo byigeze bishingira ku buhutu cyangwa ubututsi.

3.Isenyuka ry’ubumwe bw’Abanyarwanda

Ubumwe bw’Abanyarwanda bwagiye busenyuka mu bihe bitandukanye by’amateka ariko cyane cyane Abakoloni nibo bagize uruhare rukomeye mu kubusanya, uwo murongo batangije waje gukomezwa n’ Abanyarwanda ubwabo muri Repubulika ya mbere n’iya kabiri.

3.1. Uruhare rw’ubukoloni mu gusanya ubumwe bw’ Abanyarwanda

Ibyiciro by’Abanyarwanda “Abahutu, Abatwa n’Abatutsi” byahinduwe amoko n’abakoloni binyujijwe mu murongo wa politiki, uburezi n’ivugabutumwa. Uruhare rw’ubukoloni mu gutandukanya Abanyarwanda bisobanurwa n’ingingo zikurikira:

- Kugira umunyarwanda igikoresho mu bihe bitandukanye,
- Kwigisha no gucengeza ibitekerezo ko Abanyarwanda – Abahutu, Abatutsi, Abatwa- ntacyo bapfana; no guhindura amateka yabo;

- Gukoresha amoko Hutu/ Tutsi mu rwego rwa politiki yo gucamo abantu ibice hagamijwe inyungu z’ubukoloni (divide and rule),
- Gusumbanya abantu no guheza bamwe (Ivangura ry’abakoloni ryaheje abahutu n’abatwa, riha imyanya mu mashuri no mu buyobozi agace k’abatutsi ariko byitirirwa Abatutsi bose);
 - Abatutsi batoranijwe bayobotse igitutu cy’abakoloni kugirango batanyagwa (imyanya yahabwaga ababaga babayobotse);
 - Gukuraho ubuyobozi bwa cyami busimburwa n’ubwa gikoroni;
 - Kunyaga abatware b’umwami bakabasimbuza abo bagize ibikoreho;
 - Kuvanaho zimwe mu nzego z’imiyoborere y’ubutegetsi bwa cyami (Umutware w’umukenke, uw’ubutaka n’uw’ingabo);
 - Abatware b’ abahutu n’abatwa baranyazwe;
 - Gukuraho imihango gakondo itandukanye ya cyami yarindaga igihugu n’itorero;
 - Gushyiraho umwami bashatse;
 - Guhindura imyemerere yahuzaga Abanyarwanda no gutesha agaciro umuco wabo;
 - Gushyiraho ubuyobozi butandukanya Abanyarwanda, kubateranya, gusenya, gutwika, kwica;
 - Gutonesha Abatutsi, abakoloni babisimbuje gutonesha Abahutu bagamije inyungu zabo no kugira ngo u Rwanda rutabona ubwigenge;
 - Gushyiraho no gushyigikira imiyoborere ishingiyeye ku buhutu (PARMEHUTU/Parti pour l’émancipation des Hutu), ishyaka ryashyigikiye ivangura ry’Abanyarwanda no guheza Abatutsi.

3.2. Uruhare rwa Repubulika ya mbere n’iya kabiri mu gusenya Ubumwe bw’Abanyarwanda

Repubulika ya mbere n’iya kabiri zagize uruhare mu buryo bukurikira:

- Gushimangira ibitekerezo n'imikorere y'ivangura rya gikoloni;
- Gutoteza Abatutsi no kubacira ishyanga, kubaheza mu buhunzi, kubaheza mu myanya y'ubuyobozi no mu mashuri;
- Iringaniza mu mashuri no mu mirimo rishingiye ku moko n'uturere, ariko cyane cyane rigamije guheza Abatutsi;
- Amoko yakoreshejwe nk'uburyo yo kugera no kugundira ubutegetsu;
- Politiki y'ivangura yashyize imbere gupfukirana ikibazo cy'uburenganzira n'icy'ubuhunzi aribyo byatumye haba urugamba rwo kubohora igihugu rwatangijwe na FPR-Inkotanyi.

4.Ingaruka z'isenyuka ry'ubumwe bw'Abanyarwanda

- Jenocide yakorewe Abatutsi ni umugambi wo kurimbura Abatutsi bishingiye ku bwoko bwabo, Abahutu bakaba barashishikarijwe kwica Abatutsi;
- Igeragezwa rya Jenocide ku batutsi bari batuye henshi na henshi mu gihugu (Kibirira, Bigogwe, Bugesera);
- Jenocide ntiyabaye kubera ihanurwa ry'indege yari itwaye Habyarimana; kubera ko kwica abatutsi n'umugambi wo kubatsemba byatangiyeye akiriho, na KAMBANDA Yohani wari uyoboze Guverinoma yiyise iy'abatabazi yarabyemeje.

5.Urugendo rwo gusana ubumwe bw'Abanyarwanda

Hageze igihe, abahejwe mu Rwanda bishyize hamwe n'abari bamaze kurambirwa ingoma y'igitugu, bafata intwaro batabara u Rwanda ngo bavaneho ubutegetsu bw'amacakubiri n'akarengane. Mu nzira ndende yo kubaka Ubumwe bw'Abanyarwanda, u Rwanda rwageze kuri byinshi, mu by'ingenzi twavugaga nko:

- kubohora Igihugu no guhagarika Jenocide;
- gushyiraho Leta y'Ubumwe bw'Abanyarwanda;

- ibiganiro nyunguranabitekerezo byo mu Rugwiro byatanze icyerekezo mu kubaka Igihugu;
- hashyizweho inzego zitandukanye zirimo Komisiyo y'Ubumwe n'Ubwiye na Komisiyo yo kurwanya Jenoside;
- imiyoborere myiza, Umutekano, Ubutabera, Inkiko Gacaca, icyerekezo 2020....
- impunzi, iza kera n'iza 1994 zaracyuwe zisubizwa mu buzima bw'Umunyarwanda, iwabo i Rwanda;
- umutekano w'abantu n'ibintu wagaruwe bwangu;
- ingabo zahagaritse Jenoside zihuzwa n'iza leta yari imaze gutsindwa zahurijwe mu ngabo z'Igihugu;
- kubaka igihugu kigendera ku mategeko na politike y'ubumwe : Indangamuntu yanditse ubwoko yakoze ibara yaciwe mu Rwanda;
- kubahiriza uburenganzira bwa muntu bishyirwa imbere;
- guca umuco wo kudahana birimakazwa;
- Abanyarwanda ubu bafite amahirwe angana ku byiza by'urwababyaye, mu mashuri mu kazi n'ahandi;
- umutekano urambye usubizwa agaciro, buri Munyarwanda awugiramo uruhare, wunganirwa n'Inzego z'umutekano zibifite mu nshingano (Ingabo na Polisi). Ubutabera bubereye u Rwanda n'ibibazo byarwo bwatekerejwe bihabwa umwanya.

6. Inkingi z'ubumwe n'ubwiye

Imibanire myiza y'abantu ishingira ku bintu byinshi bitandukanye bituma umuntu yumva akunze kubaho ubwe kandi afite n'icyizere cyo kuramuka. Mu ishema ryo kubaho ubwe kandi afite n'icyifuzo cyo kubana n'abandi kuko abandi badutera ishya ryo kubaho neza buri muni.

Ubumwe n'ubwiye bushinga imizi mu muryango w'abantu wemera ko abawugize bese bafite uburenganzira bungana mu mibereho yabo kandi utanga icyizere cyo kubaho ejo hazaza mu mudendezo.

6.1. Imiyoborere myiza

Imiyoborere myiza ni imiyoborere iha umuturage ijambo n’uruhare rusesuye rwo kwikemurira ibibazo bye afatanije n’ubuyobozi yishyiriyeho. Ubuyobozi bwiza burangwa na bimwe muri ibi bikurikira:

- kurwanya akarengane;
- kurwanya ivangura aho riva rikagera;
- gufasha abaturage kwiteza imbere;
- kugira uruhare mu gushyiraho amategeko agenderwaho;
- ubuyobozi bwiza bwemera kandi bushyira mu bikorwa amahame ya Demokarasi arimo:
 - kwishyiriraho abayobozi;
 - kwegereza abaturage ubuyobozi n’ubushobozi mu bikorwa byose;
 - gukorera mu mucyo;
 - gushyirwa ku munzani harebwa ibyiza n’ibibi ngo habeho kwikosora (accountability);
 - kubahiriza uburenganzira bwa muntu.

6.2. Ubutabera

Ubutabera bwumvikana nk’uburyo bwo kurengera abantu hakoreshejwe iyubahirizwa ry’amategeko igihugu kigenderaho. Abaturage bakwiye kumenya amategeko ntibahure nayo abahana gusa. Ayo mategeko kandi aba akwiye kubahirizwa kimwe ku bantu bose batuye igihugu kugirango akarengane gacike.

6.3. Umutekano n’imibereho myiza

N’ubwo gukena bidasobanuye ko abantu bagomba kuryana, ariko umwaga w’inzara cyangwa imibereho mibi ntibituma abantu babana neza. Aka wa mugani ngo “Abasangiyeye ubusa bitana ibisambo”.

Umuntu udafite aho aba akaba adafite icyizere cyo kurya buri muni nta n'icyizere cyo kubaho aba afite. Kuko ntacyo aba afite arengera mu gihugu, ntanagirinda umuriro wagitwika. Abantu bakwiye kwitabira gukora cyane cyane gukorera hamwe kugirango bahurize ku nyungu yo kwiteza imbere.

Leta nayo mu mikoro ifite ikagerageza kwegereza abaturage ibyangombwa by'ibanze baheraho bavugurura imibereho yabo. Imibereho myiza kandi yumvikana mu rwego rwo kugira amahirwe angana ku byiza by'igihugu, kugira uburenganzira bwo kwivuzwa, kubona imirimo, kwiga, kubona amasoko y'ibicuruzwa n'ibindi byose byaheza umwenezigihugu ku bintu bikorerwa mu gihugu cye.

6.4. Gusaba imbabazi no kubabarira

N'ubwo ubutabera bugomba gukora akazi kabwo ntabwo abantu babana neza hatabayeho iki gikorwa cyane cyane tuzirikanye amateka y'imibanire y'Abanyarwanda.

Gusaba imbabazi bivuze iki?

- Kwemera icyaha wakoze;
- kucyamagana no kubabazwa n'uko wagikoze;
- kugambirira kudasubira mu cyaha wasabiye imbabazi;
- guca bugufi no kwatura imbere y'uwo wahemukiye ugasaba imbabazi;
- kwemera igihano n'icyiru kijyanye n'icyaha cyakozwe.

Kubabarira bivuze iki?

- Kumva usaba imbabazi;
- kutagambirira kwihorera;
- kwemera ibyemezo by'inkiko;
- kwemera indishyi n'ubwo zidasimbura ibyangijwe.

Gusaba imbabazi no kuzitanga byafasha kutubakira umuryango ku nzika n'inzigo byahora bizikura kamere mbi z'amacakubiri n'ingaruka zayo. Ni n'uburyo kandi bwo kureba kure umuntu agateganyiriza urubyaro rwe imibereho myiza aho kwireba no guhoza amaso inyuma gusa; ni no kwemera ko kamere muntu ituzuye tugaharanira kuyigira nziza buri gihe.

7.Inzitizi zikigaragara mu nzira y’ubumwe n’ubwiyunge

Ubumwe n’ubwiyunge ni urugendo rurerure rusaba guhozaho, n’ubwo hatewe intambwe igaragara; haracyari ikibazo cy’imyumvire n’ingengabitekerezo ya Jenocide ihemberwa n’abagitsimbaraye ku nyigisho mbi batojwe igihe kire kire.

Bamwe mu babyeyi gito batoza abana babo ingengabitekerezo ya Jenocide n’iy’amacakubiri.

Hari kandi ingaruka za Jenocide yakorewe abatutsi zirimo ihungabana, ibikomere, imitungo n’indishyi bitarishyurwa n’abakoze Jenocide.

8.Ingamba zo guteza imbere Ubumwe n’Ubwiyunge

- Gukomeza gukangurira Abanyarwanda umuco w’amahoro, ubworoherane, ubufatanye n’ishema ryo kuba Abanyarwanda bashyize hamwe binyuze mu nzira zitandukanye: Itorero, amahugurwa, ibiganiro, itangazamakuru ryubaka, umuco nyarwanda;
- Gutoza abato indangagaciro nyarwanda no kuzibutsa abakuze maze kirazira ikaziririzwa, ikiremwa muntu kikubahirizwa, Abanyarwanda bakuzura ubumuntu;
- Gutoza urubyiruko uburere mboneragihugu bubereye umunyarwanda wakwigirira akamaro akakagirira abandi ndetse n’igihugu cye;
- Gutoza Abanyarwanda kumva ko u Rwanda ari urwabo, ko rubabyaye, bakaruturira, bakarukunda, bakarurinda, byaba ngombwa bakarwitangira;
- Gutoza Abanyarwanda gukunda u Rwanda n’Abanyarwanda no guhora iteka bazirikana kuzaraga ababyiruka igihugu cyiza. Ukunda iwabo ahazirikana iteka, akaharinda icyago, akahagwiza ibyiza. Ni yo mpamvu tugomba kubaka ejo hazaza hazira amacakubiri, harangwa n’ubupfura n’ubumuntu;
- Gushyira imbere Ubunyarwanda n’inyungu z’Abanyarwanda bose mbere yo kwibonamo amoko, isano, idini, akarere,

igitsina n'ibindi (Kwimakaza gahunda ya "Ndi umunyarwanda" mu nzego zose);

- Kubaka umuco w'ibiganiro byimbitse ku nzego zose z'Abanyarwanda, abayobozi n'abaturage bigamije komorana ibikomere no kubaka ubwizerane mu banyarwanda;
- Kwibuka Jenocide yakorewe Abatutsi no gukumira Jenocide n'ingengabitekerezo yayo;
- Gukomeza ingamba zo kurwanya ubukene (gukorera mu makoperative, Girinka, ubudehe...)
- Kwiha agaciro no gukunda umurimo.

9.Uruhare rw'urubyiruko mu guteza imbere ubumwe n'ubwiyunge

Uruhare rw'urubyiruko rugomba gutangirira mu gutandukana n'ingoyi ziboshye imitima yarwo. Kubohoka ku mutima bisobanuye kwiyemeza kuba wowe ubwawe mu gufata ibyemezo witandukanyije n'ibishobora kukuboha bigatuma upfukirana ukuri kugira ngo utihungabanya. Kubohoka ku mutima ntibituma utabana n'abandi, ariko ntuba abandi ngo wowe uburire mu bandi.

Inyigisho n'amategeko duhabwa n'umuryango tuvukamo bituma dusa nk'umuryango twinjyemo. Kugirango bigerweho umuryango wifashisha inzira nyinshi zavuzwe haruguru (impamvu z'amacakubiri) zitoza abantu uburyo bwo gusobanura ibimukikije n'uburyo abana nabyo.

Amateka yacu bwite, ishusho y'abandi yiremye muri twebwe n'ishusho bwite twifitiye nibyo bikunze kutuyobora mu isesengurwa ry'ibibazo umuryango wacu uhura nabyo.

Umusozo

Ubumwe bw'Abanyarwanda bwahozeho bukaba bwari ishingiro ry'imbaraga n'ishema ry'Abanyarwanda. Aho busenyukiye byagize ingaruka ku muryango nyarwanda, amacakubiri ahabwa intebe asenya umuryango nyarwanda awugeza ku bwizerane bucyeye n'ubwicanyi mu bihe bitandukanye byaje kutugeza kuri Jenoside yakorewe Abatutsi.

Nyuma ya Jenoside yakorewe Abatutsi, Leta y'u Rwanda yashyize imbaraga cyane cyane ku biteza imbere ubumwe n'imibanire myiza by'Abanyarwanda. Ifatanyije n'izindi nzego ndetse n'Abanyarwanda muri rusange barwanya ivangura iryo ariryo ryose n'itonesha aho ryashingira hose. Ubunyarwanda ni nkingi ikumira itonesha n'ivangura.

Amateka Abanyarwanda twanyuzemo, ameza azatubera amasomo dukurikiza, amabi tuzayirinda.

U Rwanda ni igihugu cyacu twese dufitemo uburenganzira n'ubuzare bungana. Aya ni amateka mashya turimo kubaka, tugomba gukomeza tukazayaraga n'abana bacu.

Ubumwe nizo mbaraga z'igihugu ni ukwemera gufatanya no kwemera ko muri wowe no mu bandi harimo imbaraga zashyirwa hamwe zikagira akamaro ni bwo buryo bwonyine buteza imbere imibanire n'imibereho myiza.

Ngiyi imyitwarire yatuma abantu babana neza bakanashobora kwiteza imbere.

Birakwiye ko Abanyarwanda batandukana n'imyitwarire ishingiyeye ku macakubiri n'ibiyakurura maze bakagana inzira y'ubufatanye n'amajyambere arambye. Abanyarwanda muri rusange n'urubyiruko by'umwihariko bafite inyungu nyinshi mu guhitamo amahoro n'imibanire myiza byo shingiro ry'iterambere.

► INSANGANYAMATSIKO YA V

GUKUMIRA, GUHOSHA NO GUKEMURA AMAKIMBIRANE MU MURYANGO NYARWANDA

0.Iriburiro.

Iyi nyoborabiganiro ku makimbirane izafasha ababyiruka gusobanukirwa ishingiro n’imiterere y’amakimbirane mu mibereho n’imibanire yabo mu muryango n’uburyo bayitwaramo ntabe intandaro yo kubasenyera. Inyoborabiganiro ku makimbirane izatuma abantu barushaho kumenya uburyo bunoze bwafasha mu kwikemurira amakimbirane neza kandi ku gihe no guhora hagenzurwa icyateza cyangwa icyaba imbarutso y’amakimbirane asenya.

1.Intego rusange :

Intego rusange y’inyoborabiganiro ku makimbirane igamije kubaka ubushobozi mu gusesengura ibyatera amakimbirane mbere y’uko aba no gufata ingamba zatuma akumirwa cyangwa akemurwa.

1.1. Intego zihariye :

Nyuma yo kwifashisha iyi nyoborabiganiro ku bazayikoresha izatuma haba ibi bikurikira :

- Gusesengura no guhuza imyumvire n’imitekerereze itandukanye ku makimbirane ;
- Gusesengura imiterere n’imihindagurikire by’amakimbirane n’ingaruka zayo ;
- Gusobanura no gusesengura amakimbirane n’ibiyatera n’uburyo abantu bayitwaramo ;
- Kugenzura no gukurikirana imiterere y’amakimbirane agenda aba no gutanga ubufasha mu kuyakemura.

2. Amakimbirane ni iki ?

Amakimbirane yumvikana hagati y'abantu nko kutemera cyangwa kutihanganira ibibatandukanya. Niyo mpamvu mu makimbirane buri wese yumva ko afite ukuri kurusha abandi. Amakimbirane ashobora kugaragara nko kutumvikana, ubushyamirane, kutareba ibintu kimwe, kwangana ndetse n ibindi.

Amakimbirane yaba ubushyamirane, kutavuga rumwe cyangwa kutumvikana hagati y'abantu 2 cyangwa benshi bikomoka ku:

- myumvire inyuranye n'ibyifuzo;
- inyungu zitandukanye;
- ibitekerezo n'imyitwarire bitandukanye;
- kuvutswa urukundo (Denied love).

Na none bisobanuye, kutumvikana cyangwa se kugongana kw'ibitekerezo mu muntu ubwe, hagati y'abantu, hagati y'udutsiko tw'abantu, uturere ndetse n'ibihugu biturutse ku mpamvu zinyuranye.

Amakimbirane mu buzima bw'abantu mu mibanire yabo ntashobora kubura kuko ahari abantu hatabura amakimbirane. Akaba rero ariyo mpamvu abantu bagomba kwiga uburyo bwo kuyahosha cyangwa kuyakemura. Hari umugani w'ikinyarwanda uvuga ko *ntazibana zidakomya amahembe*.

Akenshi abantu bakunze kumva amakimbirane ko ari ikintu kibi bagomba kurwanya cyangwa kwamaganira kure.

Ese twavugaga ko amakimbirane ari ikintu kibi buri gihe?

Abongereza bavugaga ko amakimbirane (conflict) is “ *an opportunity or chance for change as well as a risk or danger*”. Mu by'ukuri, ibi bisonura ko amakimbirane ntawavugako ari ikintu kibi cyangwa cyiza. Ahubwo uburyo tuyitwaramo nibwo butuma aba intandaro y'amajyambere cyangwa intambara.

Amateka yuko abantu babayeho, uburyo bitwara, uburyo babonamo ibintu hamwe n'imibereho cyangwa ibyo umuntu agenda abona nibyo bituma yitwara uko yitwara.

Urugero: Perception y'ikintu kimwe mu buryo butandukanye cyangwa ibintu bitandukanye biboneka mu buryo bumwe. **Σ W M.** Bitewe ni nyungu umuntu abifitemo, cyangwa ubundi buryo umuntu arebamo ibintu, **Σ** ishobora kuba **W** cyangwa **M**.

Ntakuntu amakimbirane yabura kandi abantu tudakunda ibintu kimwe, tuateye kimwe, dutandukanye mu mibonere, imyumvire ndetse n'imyitwarire nta kuntu rero amakimbirane yabura mu bantu.

Niyo mpamvu tugomba kumva ko amakimbirane ari kimwe mu biranga imibanire y'abantu, icy'ingenzi ni ukugerageza kuyakumira byakwanga ukagerageza kubana nayo ntiwumve ko ari ijuru ryaguye.

3.Icyo amakimbirane ashingiyeho

3.1 Amakimbirane ashingiyeho ku mitungo (resources): aya ni amakimbirane yoroshye kubona cyangwa kumenya kandi n'uburyo bwo kuyahosha buroroshye. Aya aba iyo abantu 2 cyangwa benshi bakeneye ikintu kimwe kugisaranganya cyagwa kukigabana bikagorana.

Umwe agashaka kukiharira kandi undi yumva nawe agifiteho uburenganzira, ni uko amakimbirane akavuka. Urugero ubutaka busangiwe n'umuryango ufite abantu barenze 2 iyo bashatse kubugabana nti bikorwe neza byateza amakimbirane.

3.2 Amakimbirane ashingiyeho ku bintu umuntu aha agaciro (values): aya ni amakimbirane akomeye kandi atagaragara ndetse atoroshye kumvikana cyangwa gukemurwa. Ashingiyeho ku myumvire n'imitekerereze cyangwa imibonere

y'ibintu. Abenshi bashobora no kwitangira ibyo bemera bakaba ibitambo kabone nubwo rimwe na rimwe batari mu kuri. Urugero ubuhezanguni bushingiye ku myemerere y'amadini.

3.3 Amakimbirane ashingiye ku mitekerereze n'ibyifuzo by'umuntu (psychological needs). Aya ni amakimbirane adashobora kuboneka mu buryo bufatika cyangwa buboneka ariko kandi agira ingaruka nini ku mitekerereze n'ubwonko bw'umuntu. Urugero : niba umuntu avukijwe urukundo, abuze umutekano, ahejwe mu bandi, nta nshuti afite, ashobora kumva yiyanze maze akarangwa n'umwaga.

4.Ibitera amakimbirane

Amakimbirane aterwa n'ibintu byinshi ariko iby'ingenzi umuntu yavuga ni:

- ukutubahiriza amategeko;
- ubuyobozi bubi;
- kubura ibyangombwa by'ibanze mu buzima ;
- ibitekerezo bitandukanye bishingiye ku idini, amateka y'Igihugu cyangwa amashyaka atavugwaho rumwe;
- kuvutswa urukundo n'uburenganzira bwa muntu
- ugusaranganya nabi umutungo
- kwiheba no kubura iby'ibanze
- kwitiranywa n'ikoreshwa ry'ibintu ;
- ruswa, ikenewabo, itonesha n'inda nini;
- ubukene;
- ubujiji
- amoko
- amadini
- indimi bavuga
- uturere bakomokamo
- n'Ibindi

Ibyo byose bivuzwe haruguru akenshi biterwa na politiki cyangwa uburyo bw'imiyoborere mibi iranga umuryango w'abantu cyangwa ibihugu.

5.Ubwoko bw'amakimbirane

- Amakimbirane asanzwe / Dispute / Litigue;
- Amakimbirane ari mu muntu;
- Amakimbirane asasiweho - Underlying Conflict;
- Amakimbirane afite cyangwa se ashingiye ku mizi miremire/ Deep rooted.

6.Inzego z'amakimbirane

Amakimbirane akorera mu nzego 6 ari izi zikurikira :

- **Amakimbirane mu muntu:** aya ni amakimbirane ari mu muntu ubwe. Uru rwego rw'amakimbirane ntabwo rushobora kugaragarira buri muntu wese kuko rukorera mu muntu ubwe ahubwo akenshi bigaragazwa n'i myitwarire y'abantu. Ingero ni ugukoresha igihe, guhitamo uwo muzabana, guhitamo kureka ingeso. Muri make ni ibitekerezo bigonganira mu muntu ubwe bigatuma agaragarako adatuje kandi afite ikibazo.
- **Hagati y'abantu:** amakimbirane hagati y'abantu 2 cyangwa benshi bapfa ikintu runaka batumvikanyeho.
- **Hagati y'amatsinda:** umuntu yavuga nk'imiryango, *clubs*, amashyirahamwe cyangwa ibigo bifitanye amakimbirane hagati yabyo n'ibindi.
- **Mu tsinda ubwaryo:** urugero ni hagati y'abantu cyangwa udutsiko mu itsinda rimwe ubwaryo riba ryifitemo amakimbirane.

- **Hagati mu gihugu:** ni ukuvuga amakimbirane agizwe n’udutsiko tunyuranye ariko turi mu gihugu imbere. Urugero Interahamwe, mayi mayi muri Congo.
- **Hagati y’ibihugu.** Aya ni amakimbirane hagati y’igihugu n’ikindi cyangwa n’ibindi kubera: ingengabitekerezo badahuje, gupfa imipaka, cyangwa izindi nyungu.

7.Uko amakimbirane yigaragaza

- Amakimbirane agenda yiyubaka, ahindura isura no kurushaho kugira ingufu (cluster of event)
- Amakimbirane atwara igihe kugira ngo yigaragaze
- Amakimbirane ashobora kutera urujijo
- Amakimbirane anyura mu byiciro bitandukanye “conflict cycle” urugero mbere abantu baba bafitanye amahoro, amahoro akabura kubera impavu zitandukanye, amakimbirane agatangira kwigaragaza, inzangano, imvururu n’intambara bikavuka.

Mu ntangiriro abafitanye amakimbirane barigaragaza. Abafitanye amakimbirane bakurikizaho kwitandukanya twe, bo/bariya). Kuri iki cyiciro nta hohoterwa riba ryagatangiyeye. Nyuma abafitanye amakimbirane bagaragaza inzangano n’umujinya bitana abanzi (twe, bo). Aha buri ruhande ruba rushakisha ababashyigikira. Ibikorwa by’ihohoterwa bitangira gufata intera hanyuma gukozanyaho ku mugaragaro hagati y’impande zihanganye zitangira ubushotoranyi byaba na ngombwa bakarwana. Kuri iki cyiciro birashoboka ko agahenge kaboneka kuko habayeho kuneshwa k’umwe mu bafitanye amakimbirane.

8.Uburyo bwo gusesengura amakimbirane

- **Abantu(Actors):** ni bande cyangwa ni utuhe dutsiko dufite amakimbirane? Abandi areba ariko batari ba nyirayo? Abo azagiraho ingaruka ni bande? Abayobozi bayarimo ni


bande? Inzego z'ubuyobozi bwabo ziteye zite? Bo aya makimbirane bayabona gute? Imbaraga bafite n'izihe?

- **Inzira/ Attitudes:** imbarutso yayo makimbirane ni iyihe? Ese hari ibyo basanzwe basangiye? Buri ruhande rwakwifuzaga gufata iyihe nzira? imihindagurikire y'amakimbirane ni yihe? Impamvu nyirabayazana ni izihe? Amakimbirane aragenda akura gute? Abafasha kuyakemura bafite ubushobozi ki? Bakoresha iki, gute?
- **Ibibazo bapfa/incompatibility:** inyungu za buri ruhande ni izihe? ibyo bapfa ni ibiki? inyungu zabo zaba zitandukanye cyane se? zigonganira he/zihurira he? buryo ki impande zombi zagera ku nyungu zihuriyeho? uburyo hari aho bagonganira? ese ibyo basangiye ni ibiki? ibyo batsimbararaho ni ibiki? Ibivugwa ni ibiki? Ibitavugwa ni ibiki? icyakorwa kugirango akemurwe ni iki? **“Talk of triangle and tree as an example”**

9. Uburyo bwo gusesengura amakimbirane (ibishushanyo)

Figure 1

Ibisobanuro ku misesengurire y'amakimbirane hashingiwe ku bice bigize igiti aribyo (a) amashami, (b) igihimba (c) imizi.



Ibisobanuro:


- A) Amashami y'igiti: imbarutso y'amakimbirane “trigger causes”
- B) Igihimba: aha bishobora kuba zimwe mu mpamvu zatera amakimbiran cyangwa zayahembera akaba. “Approximate causes”
- C) Imizi y'igiti: aha niho hari impamvu nyakuri zitera amakimbirane ni naho zishingiye “structural causes of the conflict”

Icyitonderwa:

- Iyo amakimbirane yatinze gukemurwa ashobora guteza /kubyara andi makimbirane mashya ashamikiyeho

Figure 2.

Abantu (Actors)



Inzira/ Atitudes Ibibazo bapfa/incompatibility

10.Akamaro ko gusesengura amakimbirane

Gusesengura amakimbirane bifasha ushinzwe kuyakemura gukoresha uburyo bunoze kandi burusha ubundi kuko aba yasobanukiwe neza ibyateje ayo makimbirane mu buryo bucukumbuwe. Gusesengura amakimbirane bifasha cyane muri ibi bikurikira na none:

- Kumenya neza ibitera amakimbirane, ingaruka zayo n'uburyo agenda ahindura isura,
- Kumenya ibintu byose biyihishise inyuma,
- Gusobanukirwa amavu n'amavuko yayo,
- Kumenya amatsinda cyangwa abantu barebwa nayo,
- Kumenya imitekerereze n'isano y'abari mu makimbirane,
- Kumenya aho inkuru zaturuka bifitanye isano n'amakimbirane
- N'ibindi

11.Amahame y'usesengura amakimbirane

- Agomba gushingira ku nkuru zicukumbuwe mu buryo buhagije,
- Agomba gutandukanya ibitekerezo n'ukuri,

- Agomba gusesengura ku buryo bwaguye ashingiye ku mibereho n'imibanire, ubukungu/ubushobozi na politiki/imiyoborere
- Agomba kumenya inkuru zose zishoboka akaba arizo ashingiraho
- N'Ibindi.....

12.Ingaruka z'amakimbirane

Amateka y'uko abantu babayeho, uburyo bitwara, uburyo babonamo ibintu "perception" hamwe n'imibereho cyangwa ibyo umuntu agenda abona nibyo bituma yitwara uko yitwara. Amakimbirane rero ni ngombwa kuko mu miterere ya kamere muntu ifite umwihariko, kandi ntibona ibintu kimwe ahubwo icy'ingenzi ni ukumenya uburyo tuyitwaramo hagamiye kubaka buri wese.

Ingaruka z'amakimbirane rero zaba nziza cyangwa mbi bitewe n'uburyo abantu bayitwayemo.

12.1 Impinduka nziza zubaka

- Gufasha kwimenya, kumenya abandi, kumenya ukuri n'iterambere
- Amakimbirane afasha kuyobora ibitekerezo, imyitwarire n'ibyifuzo byayobye,
- Ni ishingiro ry'uburambe n'ubumenyi
- Amakimbirane atanga amahirwe yo kongera gusuzuma imibanire,
- Afasha gukosora ibitagenda neza

12.2 Ingaruka mbi z'amakimbirane

- Gusenya imibanire y'abantu;
- Gusenya Igihugu n'imitungo y'abantu;
- Kudindiza iterambere muri rusange;
- Guhitana ubuzima bw'abantu;
- Ingegabitekerezo mbi nka Jenoside;

- Inzangano, n’inzika ;
- Intambara z’urudaca n’ubuhunzi;
- N’ibindi...

13.Uburyo bwo gukumira, guhosha no gukemura amakimbirane

Gukemura amakimbirane hakenewe uruhare rwa buri wese ariko muri rusange hari uburyo butandukanye bwakwifashishwa mu gukemura amakimbirane. Bumwe muri bwo ni ubu bukurikira:

- Gukumira
- Guhosha amakimbirane
- Kugabanya ubukana bw’ amakimbirane
- Gukemura
- Kuyahindura
- Gukoresha ingufu:
 - a) amategeko
 - b) igisirikare n’igipolisi
 - c) inkiko
- Imishyikirano
- ubuhuza
- Ubuhuza butavugirwamo
- Ubwiyunge

Gukumira amakimbirane “Conflict prevention” bisobanuye kubona amakimbirane mbere yuko aba no kugira ubushake bwo kuyabuza kwihembera ngo bitabyara urwikewe, umwiryane, imvururu, n’intambara. Gushyiraho ingamba/uburyo butuma amakimbirane atavuka.

Kugabanya ubukana bw’amakimbirane “Conflict mitigation”: bisobanuye kugabanya ubukana bw’amakimbirane kudakomeza kwihembera ariko ntabwo bivuze ko aba yakemutse.

Kuburizamo amakimbirane “Conflict Suppresion” aha bivuga ko ari ugupfukirana ibibazo. Nta mwanya cyangwa amahirwe yo kumva

urundi ruhande iyo bibaye ngombwa hakoreshwa ingufu mu gupfukirana ibibazo aho kubikemura.

Guhosha amakimbirane “Conflict Management” ni uburyo buhosha cyagwa bugabanya ubukana bw’amakimbirane nta gupfukirana ibibazo ariko nta no kubikemura neza. Ni uburyo bugabanya ubukana cyangwa budohora uburemere / gukomera kw’amakimbirane hagamijwe gukemura ibibazo nyirabayazana bitera kutavuga rumwe

Gukemura amakimbirane “Conflict resolution” bisobanuye gushakira amakimbirane yavutse ibizubizo mu buryo burambye kugira ngo amakimbirane akemuke burundu. Conflict management na Resolution biza nyuma y’uko amakimbirane yavutse kugira ngo ahoshwe cyangwa akemurwe.

Umushyikirano “negotiation” impande zombi zishyamiranye zirumvikana zikaganira ku bibazo. Abafitanye ibibazo nibo ubwabo bishakira imizi y’amakimbirane aho ari n’uko ateye noneho hakabaho no kumvikana ku nyungu zibabereye bombi cyangwa bose iyo ari benshi. Ikigaragara kuri uru rwego ni uko usobanukiwe neza kurusha undi ashobora no kubona inyungu kurusha mugenzi we mu mikemurire y’ibibazo. Win/win hafi bose bishimira imyanzuro.

Ubuhuza buvugirwamo “mediation” kuri uru rwego, abafitanye ibibazo ubwabo bishakira umuhuza (mediator) akagerageza kubumvikanisha. Mu by’ukuri, ubuhuza ni uburyo bumwe bwa negotiation. Aha umuntu yavuga ko ari ubwumvikane hagati y’abashyamiranye babifashijwemo n’umuhuza udafite uruhande abogamiyeho. Umuhuza uruhare rwe ni ukugerageza kubahuza no kubumvikanisha ariko ntabafatira ibyemezo, nibo ubwabo babyifatira. Aha niho ubu buryo butandukanira na arbitration we abafatira umwanzuro.

Gukoresha “ubuhuza butavugirwamo “Arbitration” abafitanye ibibazo cyangwa amakimbirane nibo bihitiramo umuhuza,

akabakiza ariko bamwemerera ko abafatira ibyemezo. icyemezo afashe kirubahirizwa (ibyemezo bye ni ndakuka).

Gukoresha amategeko aha abashyamiranye bajya kuburanira mu nkiko. Ni ukuvuga ko byibuze abashyamiranye bose bagira uruhare mu kurushaho gukemura ibibazo byabo. Bombi bajya ku mucamanza bakamubwira ibibazo byabo, noneho akaba ari we wenyine ufata imyanzuro. Kandi ibyemezo byafashwe bikubahirizwa n’iyo uwafatiwe ibyemezo yabyanga hakoreshwa imbaraga mu kubishyira mu bikorwa. Ugereranije n’uburyo bwambere (gukoresha imbaraga) uruhare rwa buri wese ruriyongera.

Gukoresha imbaraga / ingufu nta bwumvikane mu gukemura ibibazo. Aha uruhande rumwe rufata ibyemezo ku mbaraga gusa birangwa no gutsinda no gutsindwa, win / lose. Hakoreshwa umutungo munini cyane kandi bigasenya amajyambere n’imibanire myiza y’abenegihugu kiberamo iyo ntambara yabaye. Cyakora gusa, hari ibyo bita ‘option z ’ ni ukuvuga uburyo bwa nyuma iyo ubundi buryo bwose bwananiranye ushobora gukoresha ingufu kugirango wivune abanzi “ self defence” iremewe iyo ikozwe mu kuri.

Ubwiyunge “Reconciliation” bisobanura ko buriya buryo bwose bwabanjirije busozwa n’ubwiyunge bw’abafitanye ibibazo. Ubu buryo busobanuye ko hakongera kuboneka amahirwe yo kubana neza nk’uko byahoze mbere yuko amakimbirane avuka. Ubwiyunge buhindura imibanire y’abashyamiranye bakongera kubana nk’uko byahoze mbere.


Uburyo bwo kwiyunga;

- Kwiyunga n’umutima wawe;
- Kwiyunga n’Imana;
- Kwiyunga n’abandi;
- Kwiyunga na kamere (nature)

Ibyangombwa byafasha kugira ngo ubwiyunge bushoboke:

- Kwemera icyaha k'uwagikoze
- Kwicuza ibyaha umuntu yicishize bugufi;
- Ubutabera;
- Gusana ibyangiritse
- Gusaba imbabazi
- Kudasubira ibyaha

Uburyo bwo gukemura amakimbirane .



Igisobanuro:

Dukurikije agashushanyo ka “spectrum” yo gukemura amakimbirane, kerekana ko uko ugenda uva i bumoso ahari gukoresha igitugu ujya i buryo kuri Reconciliation, niko amahoro agenda yiyongera hakurikijwe uruhare buri wese agenda agira.

14. Uko amakimbirane yigaragaza mu muryango nyarwanda

- guhangana mu magambo;
- guhangana mu nyandiko;
- guhangana mu binyamakuru;
- kudashyingirana;
- kuvangura, kwishishanya no kutizerana;
- kurwana no kwicana.

14.1. Ibibazo bishingiye ku bukene

Ubukene kimwe mu bibazo by' ingutu bikurura umwuka mubi mu baturage. Ubukene ni inzitizi ikomeye ikurura amakimbirane mu miryango kubera ko abantu bubatera kwiheba no kwanduranya, ndetse bugatuma bagira impagarara bityo ubuhemu, ishyari, inzangano, ubujura, ihohoterwa, umutekano muke ndetse n'ubwicanyi no gukora isesengura ry' ibibazo byabo bwite n'iby' umuryango mugari nk'uko umugani w'ikinyarwanda ubivuga, abasangira ubusa bitana ibisambo, ubukene ni impamvu iteza amakimbirane mu muryango nyarwanda muri iki gihe.

14.2. Ibibazo bishingiye ku ngaruka za Jenoside

- Kubura indishyi no gukererwa mu irangizwa ry'imanza no kwintangira kwishyura kuri bamwe bafite imitungo.
- Amagambo, inyandiko, no kwangiza imitungo y'abacitse ku icumu bisesereza kandi bitoteza abacitse ku icumu cyane bikorwa mu gihe cyo kwibuka ngarukamwaka jenoside yakorewe abatutsi.

14.3. Ibibazo bishingiye ku mutungo w'ubutaka

Kubera ko ubutaka ariwo mutungo kamere w'ingenzi u Rwanda rufite, ubuke bwabwo n'isaranganya ridashingiye k'ukuri nk'uko amategeko yisaranganya ry'ubutaka abiteganya, bikurura inzangano n'amakimbirane y'urudaca mu baturage cyangwa mu miryango ndetse no kwicana.

14.4. Ibibazo bishingiye ku buharike n’ubusambanyi

Ubuharike ni imwe mu mpamvu zikurura amakimbirane mu muryango Nyarwanda. Nibwo butera ubwiyongere bw’abaturage butajyanye n’ubushobozi bwabo. Uko abaturage biyongera niko n’ubukene burushaho kuremerera imiryango. Ibi bikaba bitera ubwihebe, ishyari ndetse n’inzangano mu miryango cyane cyane irangwamo ubuharike kubera ko umutungo usaranganywa udahagije.

Ibi bikaba birushaho kugira ubukana mu gihe umugabo uharitse akundwakaza umugore umwe, agasenda undi (Nyirankundwa na Nyirantabwa). Abana bakomoka muri iyi miryango bavutswa uburenganzira bwabo cyane cyane mu gihe ba se batabemera ndetse no kutabafasha mu bibatunga. Abagore basezeranye nabo bararakara mu gihe abagabo babo bataye ingo. Ibi bikurura umwuka mubi mu bana bakomoka kuri abo bagore ndetse bigahungabanya n’umutekano muri rusange.

Ubuharike buhembera ihohoterwa rikorerwa cyane cyane abagore, baba rabasezeranye cyangwa abatarasezeranye kubera ko bahindurwa ibikoresho byo gushimisha abagabo. Ikindi kigaragara ni uko abagabo baharitse batuzuza inshingano zabo nk’ababyeyi.

Umwanzuro

- Amakimbirane ni kamere mu muryango w’abantu;
- Hari ashobora kuba ari mu muntu, hagati y’abantu 2 cyangwa benshi ndetse no hagati y’amatsinda;
- Iyo atitaweho neza hakiri kare, amakimbirane ashobora kubyara urugomo cyangwa intambara;
- Kwirinda cyangwa kubuza amakimbirane kuba ubwabyo ntibyoro shyeye, ariko ashobora gukumirwa cyangwa gukemurwa neza.

INYANDIKO N'IBITABO BYIFASHISHIJE

1. NURC,2005: imfashanyigisho yagenewe abayobora ibiganiro mu bigo by'amashuri yisumbuye mu rwego rwo kurwanya ibikorwa bikurura amacakubiri no gukemura amakimbirane
2. PREZIDENSI YA REPUBULIKA Y'U RWANDA, Ubumwe bw'Abanyarwanda mbere y'Abazungu, igihe cy'ubukoloni no mu gihe cya Repubulika ya mbere, Kigali, Kanama 1999
3. Inosenti NIZEYIMANA, 2015, Ubumwe bw'Abanyarwanda mu mateka yabo. Igice cya mbere: Ubukoloni n'amacakubiri mu Rwanda
4. NURC,2015: Inyoborabiganiro kuri Ndi Umunyarwanda
5. NURC,2007: Politiki y'Igihugu y'Ubumwe n'Ubwiyunge
6. NURC, 2008: Imfashanyigisho y'Ingando n'andi mahugurwa
7. Lewicki, Roy Y. and alii, *Negotiation*, Irwin/MC Graw-Hiu 1999
8. NURC, *Rwanda Reconciliation Barometer*, Kigali 2015
9. M. Lindefreg, *Médiation et conciliation de Troximité* Ed. Des journaux officiels, 2001
10. Institut Canadien de Résolution des Conflits, *Devenir une Tierce Partie Neutre*, 1996
11. redekop, V., *From violence to Blessing* Novalis, 2002
12. Mukandiza, L., *Gusobanukirwa no gukemura amakimbirane mu muryangonyarwanda*, OXFAM GB Rwanda
13. Komisiyo y'ubumwe n'ubwiyunge, *Amasomo yagenewe Abakangurambaga b'ubumwe n'ubwiyunge*, 2004.
14. Repubulika y'u Rwanda (2015), Itegeko Nshinga rya Repubulika y'u Rwanda, ryavuguruwe mu 2015
15. Repubulika y'u Rwanda (2013), Itegeko Ngenga no 10/2013 ryo kuwa 11/7/2013 rigenga Imitwe ya Politiki n'Abanyapolitiki

